


T5457/3204 (4)

湯子遺書
貞

THE CHINESE-JAPANESE LIBRARY
OF THE HARVARD-YENCHING INSTITUTE
AT HARVARD UNIVERSITY

DEC 3 1955





湯子遺書卷九目錄

告諭

嚴禁徵收錢糧勒索火耗私派之弊以恤民
艱以清賦稅告諭

嚴行設法催提永禁濫差滋擾以杜侵那告
諭

嚴禁婦女入寺燃身以正風化告諭

嚴禁請託以肅官箴告諭

亢旱不雨急圖脩省以祈有年告諭

嚴禁兵丁擾民以安葭屋告諭

嚴禁濫委家丁以肅吏治告諭

嚴行飭禁告諭

嚴禁諱盜以靖地方告諭

舉行鄉約以善風俗告諭

禁止船戶涉險夜行以弭盜賊以安行旅告諭

諭

嚴禁阻葬惡習以弘孝治告諭

嚴禁營債盤剝重利以除民害告諭

嚴禁營兵放馬砮青以安民生以裕國課告諭

諭

曉諭告報版荒

嚴禁賭博以絕盜源告諭

禁畧販子女以全人倫挽頽俗告諭

嚴禁刁風以安良善告諭

明正學勤課藝告諭

禁賽會演戲告諭

禁印造馬吊紙牌告諭

禁止建碑立祠告諭

禁龍舟告諭

嚴禁私刻淫邪小說戲文告諭

嚴禁奢靡告諭

興復社學以端蒙養告諭

臨行曉諭士民

湯子遺書卷九

睢陽 湯斌 潛菴

告諭

嚴禁徵收錢糧勒索火耗私派之弊以恤民

艱以清賦稅告諭

江南財賦甲於天下小民輸將正供拮据維艱兼以近年水旱頻仍困苦尤甚不皇上軫念熒黎寤盱不遑額徵正賦之外不得橫徵私派多科勒索定有處分嚴例州縣有司務宜潔已奉法杜絕私派痛除耗羨俾民間省一分浮費即可完一分正

供司道府為屬員表率尤宜端本澄清剗剔蠹弊
禁止苞苴則州縣免分外之需小民即可受寬大
之惠額賦易于完辦各官亦免考成之累庶不負
朝廷簡任牧民之意乃有等不肖官吏惟圖營私
飽橐罔顧功令民瘼或於派徵之時浮額多科或
於收納之際加勒火耗如地畝錢糧江南各屬額
賦已重每徵正銀一兩部法之外多勒耗羨八九
分至一錢不等而江北州縣竟有加至一錢五六
以至一錢七八分者至於雜辦錢糧如行夫牙戶
匠班漁課碾餉等項竟不開明每丁應徵數目止

開某戶應徵幾丁字樣通同奸胥蠹役恣意橫徵
每丁止應徵正銀一兩四五錢者竟徵二三兩仍
復加四五勒耗再如酒稅一項原因用兵需餉暫
行徵收為民牧者自應體恤民隱照額收解乃視
同凡肉亦復加四徵收更有並非額編橫行派累
如田房稅額既經按照業戶賣契計數徵收稅銀
復於田畝上按畝按甲加數派徵及借稱某項公
費并捐助名色輒加派里遞指一徵十官蠹分肥
此皆州縣刻削下民脂膏之弊也司道衙門凡遇
州縣交錢糧則有坐平耗羨名色彈兌陋規庫官

胥吏堂役以及把門轎傘之夫俱有收銀使費種種錮習難以悉數此則司道府婪索州縣之弊也此等弊竇在從前督撫歷經嚴禁稍為斂戢者固有而陽奉陰違者實多本院未出都門久已稔悉及入境以來見聞更有真切嗟小民有限脂膏上下官蠹如此層層剝削無怪乎民生日蹙朝廷正賦歲歲逋懸動盈千萬若不嚴行懲創何以救民水火無虧國儲除現在密訪叅挈外合行出示禁飭嗣後各宜洗滌肺腸改絃易轍凡州縣徵收正雜錢糧務按由單科則應徵確數如法驗派明白

開寫單票令民通曉毋容額外私加毫忽仍聽納戶照依部頒法馬按數稱兌自封投櫃櫃役止許登填流水截給串票不許執戥秤收司道衙門如遇州縣解交錢糧一依部法平準免收明白即便印掣批文送院銷算永杜積弊如有不肖官蠹怙惡不悛仍踵前項諸弊許諸色人等不時赴縣具稟一經察確官則飛疏叅挈役則立刻杖斃倘有奸頑里甲劣衿衙蠹輸納糧銀故為短少亦必查驗真實申報究懲不得窺視殷實之家借名納銀輕少籤提捉挈飽其谿壑如有此等定行飛提重

治本院執法如山言出必行斷不寬假各宜猛省
無貽噬臍慎之慎之

嚴行設法催提永禁濫差滋擾以杜侵那告

諭

江南各屬為財賦重區欵目滋繁有一項之徵解
即有一項之考成州縣印官固宜竭力徵輸以副
功令毋容墮悞而在上諸司各有督催之責貴乎
嚴立期限以程完欠不在濫差滋擾乃向來司道
府衙門立法不善惟以差提為能事不論刑名錢穀
不計輕重緩急動輒差催州縣甫及開徵而司道

府之差役接踵而至更有一項錢糧而有守催之
名不一而足此輩一下州縣惟知恣肆勒索講說
差規需索酒食谿壑既盈即置公事于不問稍不
遂欲非聳稟鎖挈即私行毆辱而州縣經承率皆
窮役既無身家以應若輩無厭之求欲冀一時稍
寬不得不多方承順因而那撮錢糧侵蝕國帑勢
所必至本院深悉此弊屢經通行飭禁近聞州縣
仍有守催坐催等差紛紛盤踞在諸司之敢於玩
違者或以州縣徵解愆期呼應不靈謂差提可以
速結獨不思司道府官為屬員表率若能設法催

湯子遺書卷九
四
提嚴立程限示以必信別有勸懲下屬縱使冥頑亦必感而知奮可以不煩差擾何竟漫無區畫惟以濫差爲事且差往往不係公事甚至有不行牌票令書吏下縣口催多係私意科斂不肖蠹役增飾恐嚇有司心知其僞不敢聲言常至那借庫項以應其求錢糧虧空都由於此尤爲不法合再示禁凡督催錢糧及一切欽部刑名事案務須設法勉勵分別勸懲示以必信必從不得輕差一役州縣各官亦宜仰體急公上緊完結勿以不差催而忽玩如敢仍前濫差下縣致滋索擾侵那情弊木

院見聞所及立即密拏差役并經承重處外定將違禁差擾緣由特疏指叅

嚴禁婦女入寺燃身以正風化告諭

婦職但司中饋閨幼專習女紅皆宜靜處閨幃別嫌明微即異姓親戚不得相見乃聞開元等寺何物妖僧創爲報母之說煽惑民間婦女百十成羣裸體燃燭肩臂謂之點肉身燈夜以繼日男女混雜傷風敗俗聞者掩耳而乃習久不察視爲故常良可哀憫即曰親恩當報生養死葬自有定禮違禮辱身是謂不孝何名報恩合行出示爲此示仰

該管官吏及軍民住持人等知悉嗣後婦女各宜
靜處閨幃不得仍蹈從前惡習入寺裸體點肉身
燈如有犯者許地方附近居民稟官嚴拏究處女
坐其父婦坐其夫僧道容隱不行舉發者解院重
責三十板枷示寺門三箇月不貸

嚴禁請託以肅官箴告諭

江蘇地號繁盛遊客所聚風俗刁詐人心險惡官
斯土者往往以情面請託敗其官聲得罪公論禍
不旋踵本院廿載林泉六年史局茹蘖飲冰甘之
若性奉命撫吳誓之關帝神前斷絕交遊不畏強

禦受賄徇情神明殛之將及一載地方官民頗能
相信惟是積習日久不肖小吏猶多藐玩不知本
院執法到底輒欲自行嘗試有一缺出爭謀署篆
皆素行貪惡敗檢無恥之徒不知世有天理王法
雖本院大聲疾呼猶然瞶瞶者此等奸徒可以百
里相寄乎夫百里之地錢糧刑名皆國計民生所
關即部選非人本院尚當白簡嚴糾稍有徇縱便
屬溺職若委署非人罪何可逭然委署重任矣而
署官不能盡職是署官負本院也若先徇情濫授
是本院以朝廷百里民命賣與匪人也即其人不

至大敗而本院之心尚可對上天告 皇上乎除
凡不自安分妄行營謀者另行糾處外合行曉諭
爲此示仰大小屬吏知悉各宜體諒本院誓神之
意恪守官箴無懷徼倖如本院不能慎終如始一
有徇假不妨公揭通衢以彰本院負國之罪如本
院清苦勞悴自甘毫無私弊亦求相諒以全晚節
幸甚幸甚

亢旱不雨急圖脩省以祈有年告諭

民間插蒔方畢惟賴雨暘時若可期豐稔不意仲
夏至今雨澤愆期近日亢旱彌甚田禾將槁本院

念切民瘼中心如灼切思天道人事感應不爽自
非官墨兵驕即係政苛刑濫除本院率屬痛自脩
省外仍建壇祈禱禁止屠沽清理刑獄惕天之變
分民之憂庶幾甘霖早沛不致薦於饑荒各宜虔
誠無飾具文

嚴禁兵丁擾民以安鄙屋告諭

江南財賦重地民間一草一木俱關國課至於各
營兵馬自有額設糧餉料乾按月支給豈容橫取
况駐防兵丁違禁擾民屢奉 嚴諭申飭犯者即
行叅處乃聞各屬有等不法營兵每借砍馬草爲

名將民間田蕩所產蘆葦恣行樵採稍或勸阻即逞兇暴鄉僻小民孰敢抗敵惟有飲痛吞聲而已甚至縱放馬匹踐踏禾苗糾合營使砍伐墳樹種種肆惡俱干軍紀該管營弁漫無約束亦屬不職除現在察訪拏究外合行嚴禁爲此示仰各營弁兵丁知悉嗣後務須嚴明紀律約束隊伍毋得縱容兵廝在外生事砍斫民間一草一木如有不遵即便據實通報革治倘該管將弁知情故縱或經本院察出或被告發定以縱兵虐民會疏指叅并拏悍兵以軍法重處決不姑貸

嚴禁濫委家丁以肅吏治告諭

地方公務該管官員各宜加意澄清剔除積弊使上不誤公下不擾民庶免咎戾胥役不過供奔走傳號令而已至於家丁乃本官私人尤不得干預地方之事本院下車之始已經嚴禁近聞各地方官抗玩不遵以衙蠹爲腹心視關防若具文無論脩造監工開倉監兌造船辦料等一概倚任家丁胥役互相結擾狐假虎威恣睢肆橫層層剝削刁難需索窘辱備至賣富差貧弊竇百出一切公事經此輩之手盡爲吞噬之具此等情狀本官豈真

聾聵不聞乎或以此輩為誠信足仗乎抑假手攫金以自肥乎溺職若此深可痛恨合行出示嚴禁為此示仰撫屬官吏軍民人等知悉嗣後一切公務如有仍前擅委家丁出外招搖刁難良懦需索私費者許被害人等不時赴轅控告官即叅挈役立杖斃各宜凜遵勿貽噬臍

嚴行飭禁告諭

各項當官久經禁革白票取物有干功令不意蘇城尚有冰窖承值官府相沿莫能革除查設廠藏冰蓋因春夏江海魚鮮遠來非冰即腐窖戶在於

臘月鑿窖收貯待時發賣以覓微利而蘇州大小衙門輒以冰為驅暑納涼之具每遇夏月差票絡繹恣意白取供應上司飽送知交視為應得致窖戶雇夫雇船挑運裝送所費不貲甚且各衙門搭蓋馬廠與夫包束家伙需用草索亦著窖戶出夫打造即或稍給工價悉被胥差兵役中飽究竟不沾實惠種種弊害殊甚矜憫合亟飭禁為此示仰蘇郡官役軍民人等知悉嗣後炎天用冰務要給價平買償其工費至於搭廠夫役草索不得仍著窖戶備辦如有奸役朦官白取及混派夫役致滋

民困或經本院訪聞或被受害告發定行官叅役
挈不貸

嚴禁諱盜以靖地方告諭

吳下盜風日熾由於地方官慮處分嚴切遇有被
盜便與失主為仇逼令隱匿不報其盜情重大勢
不可掩者逼令改強為竊甚至昧却良心輒挈家
屬婦女審詢坐以是姦非盜敲拶竝行以故失主
畏其苦累不得不隱忍緘默即申報矣奉文勒緝
往來解比差役盤費悉出失主盜之所餘不盡不
止其意總要失主有不敢不諱之勢而後官長得

安然遂其諱盜之心既助盜以虐民實驅民而為
盜是官長實盜魁也如此作官惟知有自己功名
不知有良民身家性命不但上負朝廷抑且絕
滅天理每日坐堂開衙乘輿張蓋何面目與斯民
相對乎合行嚴禁以後當嚴禁保甲以清盜源如
有失盜不論是強是竊俱限三日內挈獲真盜追
出真賊申報分別照例定罪如不即行緝挈數日
之後賊已遠遁贓已花分即獲盜亦難定招若以
後仍前逼勘失主隱匿不報及借端誣讒酷刑勘
供并緝捕員役索取失主盤費及妄挈平人私下

考嚇株連無辜者或經本院訪聞或被失主告發
官員立刻題參挈役杖斃

舉行鄉約以善風俗告諭

古昔盛時士有庠序學校以樂其羣民有此閭族
黨以萃其渙禮讓興行風俗樸茂邇來教化不明
人心陷溺父兄之訓戒不先里黨之薰陶無素因
之一善未聞多以惡敗至於犯法有司輒執三尺
以繩之輕則杖笞重則絞斬每歲讞獄之章常至
千餘本院昔承乏綸閣閱諸曹奏牘每至大獄輒
反覆不置竊歎孰無父母孰無妻子一旦身罹刑

辟莫能救助爲之泣下夫先王以刑弼教非以刑
爲教也一言不教而惟刑是加豈父母斯民之意
乎今奉命撫吳見俗尚浮華人情嚚詐訐訟見於
宗族仇殺起於比閭泰伯季子之風微而專諸要
離之習勝欲挽回末俗馴致醇良條約頒頒未見
省改中夜思維人心本善豈盡下愚不移從容漸
摩自當感動鄉約之法最爲近古恭讀 上諭十
六條聖人之言廣大精微脩身齊家之道遷善遠
罪之方總不外此撫屬府州縣衛所官吏定期每
月朔望會集士民於公所其鄉鎮等處各擇一空

閩祠宇選年高有德為鄉人所重者敬謹講說務要明白痛切使人感動平居無事則互相叮嚀一有過惡則彼此訐責共存天理共守王法孝親敬長講信脩睦敦尚樸實解息忿爭無負 聖天子尚德緩刑化民成俗至意無徒視為具文

禁止船戶涉險夜行以弭盜賊以安行旅告

諭

蘇郡為南北通衢商賈往來如織又素稱澤國河港繁多經商貿易之人皆賴舟楫以利攸行應由官塘大河而走曉行夜泊以保無虞且沿塘各處

巡船汛兵聯絡防守稍有警息亦可呼應追捕乃有無知船戶或貪捷徑或圖趕路每每竟由荒僻冒險夜行以致盜賊乘機竊發莫能救援至於客商雇船俱由牙埠此輩熟知船戶來歷客商遠來投牙雇載自無疎虞常有貪鄙之夫吝惜小費不由船牙寫載私自雇覓遂致奸惡水手瞰有重資故意行走僻路勾盜劫掠甚有亡命之徒以舟為餌減價攬載誘令入彀行至中途肆行謀害不特資財一空且有性命之憂禍端莫測深可痛恨合行嚴飭示禁自後凡客商雇船裝貨務須著落埠

湯子遺書卷九
頭雇覓熟識船戶寫立票約仍由官塘大河行走
遇晚停泊民居稠密有兵所處以便巡邏不得貪
走捷徑越站夜行致有失事之虞如有牙埠不察
船戶來歷混將奸船僱裝客貨以及船戶違禁行
走僻徑者一經事發提牙埠船戶一體嚴究治罪
斷不姑徇爾等商民各宜猛省保全資本性命慎
毋行險徼倖自遺伊戚也

嚴禁阻葬惡習以弘孝治告諭

民間買地安葬原屬各從其便乃吳下惡俗每有
棍徒構同勢豪凡遇民間造墳輒借稱妨礙風水

煽惑阻撓肆行嚇詐稍不遂欲糾集打降拳勇百
十成羣或毀撇磚石灰料或夤夜掘壞地脈甚至
掀翻棺木打傷人命肆橫無忌遂至訐訟紛爭拖
累破家安葬無期終成暴露言之真堪髮指本院
稔悉此等惡習已經嚴禁不謂蘇松屬縣其風猶
熾此皆地方有司奉行不力故耳合亟嚴行示禁
爲此示仰撫屬官吏軍民人等知悉嗣後民間造
墳安葬聽從其便如有不法棍徒怙惡不悛仍敢
糾衆阻葬許受害之人指名具告地方官嚴拏解
院以憑盡法重處如有司奉行不力或經本院別

湯子遺書卷九
有訪聞定以溺職指叅決不姑寬

嚴禁營債盤剝重利以除民害告諭

放債每兩三分起息載在律令近聞各處營兵不遵定例當放債之時先扣加一利息加一折色搭配低潮短少分數帶領保人又扣尅使用茶酒花費名爲一兩其實不過錢數及至還債則利上起利輾轉盤剝動至數十倍少或拖欠輒行吊打凌辱每致赴水懸樑或逼獻產屋妻孥又有印子錢名色通計本利逐日抽取二分公然開店舖勾引鄉愚小民一時費用無出圖濟目前後即竭力經

營每日所得些微何能償還重利一入陷阱無計自脫有限之脂膏盡爲此輩吮噬聞蘇城內外開張此店者不下數十百家民生安得不蹙更有營旗苦獨力肆行撞掠與大盜等尤爲暴橫合行嚴禁嗣後百姓各安本業不得輕揭債銀各營兵丁亦各恪遵功令不得身爲中保及租房與人開張債店射利無厭地方嚴加譏察如有違犯兵則挈解該管衙門究治中保人等立行枷責仍將利銀責令賠償追券焚燬如有折算子女財產逼人赴水投繯情罪重大立即具文申報本院飛章請

旨從重處分

嚴禁營兵放馬斫青以安民生以裕國課告

諭

江南為財賦奧區寸土皆有課稅民間藝植輸糧非荒蕪廢地可比凡營伍馬匹自有額設草苴喂養如有放牧不許作踐禾稼久奉嚴綸孰敢違背乃聞有不法營弁縱兵結黨成羣放馬出城或嚙食禾麥或侵伐墓木所遇無敢撓觸如馬在田偶或驅趕即以傷馬為題無端紮詐至於水鄉茭蘆草蕩皆有賦之區兵丁借名斫青縱令小廝擅

捉農船聯舫逐隊夥結到鄉將有課蘆葦肆行砍斫公然裝載貨賣致民賠糧飲泣又草船所過之處遇民船則故意衝擊毆奪篙櫓傍村居則徧掠雞豚橫取柴草更有地方棍徒假作營裝勾引暴戾種種擾害均干軍紀向來提督總鎮熟知其弊嚴加禁飭不啻三令五申乃兵廝遠離部曲罔知遵守將令約束端在平時方今東作將興菜麥滿畦茅簷蔀屋力穡多艱尤宜斂戢安農除一面嚴飭各營弁并密訪拏究外合行出示嗣後如有不法兵丁小廝借名放馬斫青傷殘禾麥強斫蕩柴

擯捉民船擾害鄉村及地方棍徒勾引生事者諸
色人等協力擒拏解官申究以憑軍法嚴治

曉諭告報版荒

長洲縣版荒田地本院因念里民包賠苦累是以
示令自行開報定奪然功令森嚴事干地畝錢糧
題報請豁談何容易必實係不毛絕地方可據實
報明候委官察勘若一毫虛假萬一奉旨差官察
勘罪將誰歸無奈里民良頑不等竟將原有種植
可以供賦之田一槩混呈妄希蠲減以致荒數累
萬真偽難分矣目今東作方殷若委官履畝踏勘

必致妨悞農業相應停止為此示仰長洲縣里民
知悉國課嚴急無草草具題之理俟秋穫之後遴
選清廉才能官員確訪真實不毛之地另行分晰
緩其徵比量先雜辦差徭不許指名造冊等費科
派分文以致重累窮民如有故違本院一有訪聞
定行從重究處

嚴禁賭博以絕盜源告諭

士農工商各有本業賭博為非律有明禁吳下有
等無賴棍徒開賭場引誘良家子弟羣集賭博徹
夜呼盧良賤不分兵民混雜一入彀中莫能悔悟

腰纏罄盡流入匪類穿窬掏摸無所不為開賭棍徒但知拈頭取利孰論奸良以致賭博之場竟成盜藪貽禍地方深可痛恨至於紳衿讀書明理尤當砥礪廉隅戒絕怠荒名教自有樂地何乃亦以鬪馬吊為事總緣習俗以成莫能自振甚至與士卒細民為伍禮讓全無惟憑機械惡習久經嚴禁印造馬吊紙牌令其改業孰意愍不畏法之徒仍不悔悟除現在查訪拏究外合行嚴禁為此示仰諸色人等知悉士農工商各務本業不得相聚賭博陷入不義甘蹈法網如有不法棍徒開場糾賭

以及私造紙牌暗行發賣許地鄰保甲人等協力擒拏赴稟本縣印官轉解本院究詢明白按律從重治罪如地鄰保甲徇情容隱事發一體究處各宜猛省毋自執迷

禁畧販子女以全人倫挽頹俗告諭

畧販之罪新例甚嚴乃吳下惡俗有等奸媒牙保覘知貧人子女稍有姿色輒巧言哄動或稱官宦討取媵妾或稱富豪收為兒女始以重價立成文券及至攫金到手半入奸囊而為父母者止圖目前之貲財不顧骨肉之分散或父母稍有良心不

受哄騙若輩即糾合黨類俟候子女偶然出門竟行誘擡入窟展轉遠賣得價瓜分迨其父母告官追緝其去已遠杳然莫可根踪不獨骨肉分離反多公庭拖累言念及此殊堪髮指又有一等無賴之徒嫖賭放蕩衣食不給被奸媒設騙或將本身妻子自賣遠方永離鄉井甚至鬻為水販墮落娼家更有為富不仁之輩收買人家子女教習吹彈技藝通同媒媪誘紈袴子弟婪取重價賣為姬妾此種澆風惟蘇郡維揚江寧為甚愚民誤墮其術生離遠別而若輩坐享其利天理王法皆所難容

該管有司身在地方視為細事漠不相關全無禁戢溺職殊甚本院念切維風合行嚴禁為此示仰撫屬官吏軍民人等知悉凡有前項奸媒販棍以及收養瘦馬之徒嚴行驅逐出境如愍不畏死潛頓境內仍前拐販子女許鄰里保甲赴該管官據實舉報解本院審明題請正法鄰甲容隱不報一體治罪至若窮民不惜兒女遠賣他鄉有司官務須多方勸諭令其悔悟如冥頑無知甘心拋棄一并照例懲處決不姑貸各宜猛省毋蹈法網

嚴禁刁風以安良善告諭

聖賢語治不過教以田里樹畜申以孝弟禮讓遂至比屋可封刑罰可措者今日教化凌夸奸偽滋起稂莠不剪而欲休息蓋亦難矣吳中刁惡遊民最為百姓患約舉數端嚴加懲創自示之後凡以前違犯者當思渙然省改如長惡不悛三尺具在斷不寬假毋謂本院不教而殺也

一奸暴遊民結黨歃血或假稱欠債或捏騙賭博持棍操刀行兇打降一人有讐則聚眾同報一人告狀則彼此扛幫甚至窺寡婦孤兒家道殷實而柔懦愚蒙便指姦盜誘賭誘嫖或強使揭銀或唆

調爭訟又勾引旗營機匠結交衙門皂快挾同詐財互相容隱更有欺隱田糧抗逋國課窩盜窩訪保官保吏壞法亂紀真堪痛恨自示後五日內不即解散本院訪出盡法究處各重性命其毋後悔一民間或因小小口角邂逅身死竝無致死情由屍親指死者為奇貨或擡屍上門或搶家財或鎚棒劊打或傷器物勢同盜賊不厭不休以後如有此等盡法重懲枷示三月決不輕恕

一刁民心懷奸偽志在得財家中但無營生就要搽尋告狀更有一種訟師專一起滅詞訟教唆愚

民或捏寫無影虛詞或隱匿年月姓名或以活人作死或盜人墓檢屍或造混告二三十人或牽連無干婦女或假冒籍貫或擅用粘單或一狀未問一狀又投或上司衙門連遞數紙以致批問紛紛提人擾亂有分毫小事而經年不結者有東審西詳往返千餘里者飢寒疾病老弱之人連累常死庄農傭工之家盡誤生活及至事完之日不過笞杖罪名多半全無指實如此奸詐之徒擾亂生民死有餘辜往往反坐通不知懲以後州縣置無恥刁民簿除原因辨冤訴屈所告得實者不分曾否

告幾次免其登記外其餘但係半虛者即登此簿簿登三次者將本犯扭解本院以憑盡法重治所告多人除緊關重犯外其無干牽告之人所費盤纏即於本犯名下計日追銀給牽告之人收領鄉黨良民休與為禮

一造言之人無端捏事見影生風或平起滿街議論或寫帖捏名文書擅編歌謠劇戲或談說閨門是非除致出人命者即依律定罪外鄉人等但有指實者即便公舉到官有司盡法重治枷示三月本院記惡良民不與為禮

一賭博乃敗家之緣由做賊之根本開場者譬如窩主束手分財賭博者譬如盜賊夥瞞癡幼此輩若不嚴緝地方安得寧謐各州縣官於城市鄉村印貼告示但有挈獲真正賭博者除照例盡法究治外仍於本犯名下追銀十兩充賞

明正學勤課藝告諭

聖學明則風俗淳蒙養正則士習端訓練勤則藝業精吳中人士文章藻麗為天下冠而敦本正始明倫敬身之道猶有未盡講明者夫本始之教莫重於孝經而養蒙育德莫切於小學合行定期開

講為此仰該學教官即便聘耆儒每月十一日在明倫堂講孝經小學之日長吳二縣各社學教讀俱率生徒聽講月課之日教讀一體聽候課試其供給各衙門分日輪備毋得違錯

禁賽會演戲告諭

吳下風俗每事浮誇粉飾動多無益之費外觀富庶內鮮蓋藏偶遇災祲救死不贍本院不勝痛惜如遇迎神賽會搭檯演戲一節耗費尤甚釀禍更深此皆地方無賴棍徒借祈年報賽為名圖飽貪腹每至春時出頭斂財排門科派於田間空曠之

地高搭戲臺闕動遠近男婦羣聚往觀舉國若狂
廢時失業田疇菜麥蹂躪無遺甚至拳勇惡少尋
釁鬪狠攘竊荒淫迷失子女每每禍端難以悉數
本院竊為爾民計以此無益之費而周恤鄉黨親
族刊布嘉言懿行則人頌好善積累陰功何苦以
終歲勤劬所獲輕擲於一日曾有何益本院已屢
次諄諄告誡城市之間稍稍斂跡而鄉村僻處曾
未之改深為民病合行出示嚴禁

禁印造馬吊紙牌告諭

民生於勤荒於嬉故禮有游惰之罰律嚴賭博之

禁何意乃有馬吊紙牌一事士農工商各有本業
一執紙牌曠時廢業無賴棍徒引誘富豪子弟一
副之內動經數千一夕之間輸輒盈萬夜以繼日
叫呼若狂主僕混雜上下無分奸淫竊盜乘間而
起真可痛恨合行嚴飭以後槩不許印造紙牌如
再不遵立挈重究

禁止建碑立祠告諭

蘇松兩府士民紛紛具呈妄稱本院德政請立碑
建書院作生祠本院不勝駭異蘇松賦重役繁民
生困苦上下掣肘諸事維艱本院夙夜拮据捫心

自揣有過無功况現任官輒自立碑律有明禁至於建書院造生祠尤為末俗諂諛之習本院素所深惡吳門生祠如林豈必盡有功德甚至過者指斥其姓名歷數其劣狀未嘗以其有生祠而稱羨之也若周文襄王端毅海忠介三公忠直廉惠之名表表天壤史冊載之兒童知之今曾無半間之享本院欲為存俎豆之地而苦無工費為之中止可見生祠之不足為貴重至於書院原先儒講學明道之所人因避生祠之名槩稱講院尤屬無謂此皆好事無恥之徒借以媚官長詐鄉愚漁利行

私今欲加於本院是以本院為好諛喜佞之愚人何待本院之薄也合行嚴禁士民宜各守本分自安生業毋得踵習舊套上干律例

禁龍舟告諭

習俗之奢儉動關閭閻之肥瘠吳民家鮮蓋藏猶自浮費相尚如午日競渡其一也合行嚴禁自後毋論近城遠鄉一切龍舟槩不許集資脩葺如有惡少棍徒不遵禁約倡議思脩嚴挈枷示爾民各當務本凡遇令節家庭之間洗腆用酒以享高年以娛婦子既無大費又有真樂何苦以終歲勤勞

湯一遺書卷九
所得輕擲一旦荷花蕩開會亦與此同例毋得抗
違取罪

嚴禁私刻淫邪小說戲文告諭

為政莫先於正人心正人心莫先於正學術朝
廷崇儒重道文治脩明表章經術罷斥邪說斯道
如日中天獨江蘇坊賈惟知射利專結一種無品
無學希圖苟得之徒編纂小說傳奇宣淫誨詐備
極穢褻汙人耳目繡像鏤版極巧窮工致遊佚無
行與年少志趣未定之人血氣搖蕩淫邪之念日
生奸偽之習滋甚風俗凌替莫能救正深可痛恨

合行嚴禁仰書坊人等知悉除十三經二十一史
及性理通鑑綱目等書外如宋元明以來大儒註
解經學之書及理學經濟文集語錄未經刊板或
板籍燬失者照依原式另行翻刻不得聽信狂妄
後生輕易增刪致失古人著述意旨今當脩明正
學之時此等書出遠近購之者衆其行廣而且久
爾等計利亦當出此若曰古書深奧難以通俗或
請老誠純謹之士選取古今忠孝廉節敦仁尚讓
實事善惡感應凜凜可畏者編為醒世訓俗之書
既可化導愚蒙亦足檢點身心在所不禁若仍前

編刻淫詞小說戲曲壞亂人心傷敗風俗者許人
據實出首將書板立行焚燬其編次者刊刻者發
賣者一併重責枷號通衢仍追原工價勒限另刻
古書一部完日發落

嚴禁奢靡告諭

衣食之原在於勤儉三吳風尚浮華不安本分胥
隸屠沽娼優下賤無不戴貂衣繡炫麗矜奇文人
喜作淫詞疾病之家聽信巫覡欺誑輒行禱禳鼓
吹喧闐牲餼浪費貧民稱貸於人又有遊手好閒
之徒或假神道生辰或稱祈安保歲賽會慶祝雜

扮故事兒女溷淆舉國狂騫為首苛斂乾沒或因
酗酒聚博致生事端又有優觴伎筵酒船勝會排
列高果鋪設看席靡費不貲爭相誇尚更或治喪
舉殯戲樂參靈尤為無禮凡此種種一皆百姓火
耕水耨辛苦所致恣其浪費毫不檢恤民力安得
不竭國稅安得不逋自後胥隸娼優槩不許著花
緞貂帽緞靴犯者許人扭稟變價充賞疾病祈禳
若有巫覡賽會祈保罪坐事主尋常宴會不過五
簋酒船妓樂高果看席及喪殯戲樂槩行禁止如
敢故犯該地方官嚴拏究懲

興復社學以端蒙養告諭

化民成俗莫先於興學育材合行出示將本城內外及鄉區村鎮大約二十家以上者設社學一處查本鄉子弟年八歲以上二十歲以下若干人除能自備束脩外如果家貧無資者該府州縣量為設處廩穀本院亦捐俸相助再行儒學教官通查該學諸生中有學問純正品行端謹者開送聘以為師當此任者須要端肅謹慎為後生模楷先講明孝經小學教之歌詩習禮問安視膳進退揖讓之節循循善誘使知存心敦行之學然後進以四

書五經以程朱傳註為主勿玩愒歲月虛應故事大抵社學為教習學業專以養蒙育德其行止不端及出入衙門囑託公事不能安貧守道者雖文詞優長教官不得開報其剽竊異端邪說炫事立異蠱惑後生者即革去館穀另選教讀須該府州縣誠愛惻怛視民如子勤勤懇懇隆師重道方克有成數年之後士習益端禮讓可風庶不負朝廷興行教化及本院樂育人材之意果有實效者本院不靳特疏薦揚不然雖有他長無教育之實蹟難登薦牘

臨行曉諭士民

本都院撫吳二載一飲一食何莫非百姓脂膏而
地方刑名錢穀簿書鞅掌晝夜拮据未嘗暇逸心
雖無窮力實有限今蒙 聖恩優擢輔導 東宮
職任重大本當聞 命就道因欽件部案限滿當
結稍稍料理即星馳北上爾百姓念本都院愛民
有心忘本都院救民無術罷市挽留數日聚集院
署哀號之聲至不忍聞本都院與爾百姓一體相
關豈忍因本都院之行遂使爾等士廢讀書農廢
耒耜商廢貿易本都院為之寢食不安本都院於

地方利弊民生疾苦知之頗真入 朝之後或
至尊顧問或因事敷陳或九卿會議當盡力鑿鑿
言之况 聖主眷念財賦重地必簡公忠清惠才
德兼全之大臣十倍於本都院者來撫茲土爾百
姓何用多慮本都院平日告誡爾百姓之言歷歷
具在即朔望率爾百姓叩拜 龍亭講解鄉約亦
欲使爾百姓知君臣大義 朝廷恩德自今以後
願爾百姓孝親敬長教子訓孫忠信勤儉公平謙
讓事要忍耐勿得妄興詞訟心要慈和勿得輕起
鬪爭勿賭博勿淫佚勿聽邪誕師巫之說復興淫

祠蚤完 國課共享天和此本都院惓惓望於爾
百姓者本都院身在京華此心尤當往來於此地
本都院見爾百姓如此情狀既愧平日救民之道
未盡又不忍遽恣然而去但 君命不敢留輔導
東宮之任誼不敢辭惟爾士歸書舍農歸田疇商
歸市肆使本都院之心稍安無復紛紛擾亂可也
湯子遺書卷九終

湯子遺書卷十目

詩

詠史

夏日詠懷

金陵別姜西銘

贈李映碧先生

三首

題張鞠存見示鄉賢合祀傳

送黃俞邵聞訃南歸

賦得黃花晚節香

送陳別駕

長安春日行

送富雲麓請假歸閩

汪鈍翁六十初度

順治九年七月二十日 上親駕出郊外諭

遣定遠大將軍敬親王及諸將南征應制

中秋蘿翁齋中讌集

省耕

應詔 御試恭紀四十韻

院中直宿八韻

送林玉巖奉使琉球十二韻

中秋陸處實同年畱飲齋中和吳見末韻

寄示兒溥

二首

西湖聽莊蝶菴彈琴

送陳別駕之南陽

家居感懷

四首

立春

春霽友人以詩見投書此謝之

春日即事

春日感懷兼呈仲方

崇禎壬午闖寇破寧陵文學翟先生仗節死

之今督學使採輿論祀之鄉賢余感其事
聊述短章紀之

新秋雨後抑莊西齋讌集

京口贈友

錫山別賀天士

東林寺 二首

戊午應召入都留別里中親友 二首

途中苦雨

長垣北十里學堂岡有夫子廟相傳四賢言

志處

送李子德奉 言歸養 二首

辛酉二月初侍 講筵紀事 二首

擬上賜大臣遊溫泉詩 四首

題画

西來菴題壁

西來菴贈水齋上人

戲贈

贈懷慶太守 二首

詩餘

賀新郎 秋思

滿江紅 後池千葉蓮盛開漫賦

千秋歲 八月十六日夜玩月

滿庭芳 秋日閒居

湯子遺書卷十

詩

詠史

睢陽 湯 斌 潛菴

崑崙有瑤樹丹鳳翔其杪朝餐縣圃露暮宿星辰
表皓月滿晴空羽翮何縹緲我愛徐孺子清脩自
皎皎韜精在南郡高卧白雲曉羣賢方碌碌誰能
測渺杳郭泰獎人倫申屠耽林沼浩然凌雲姿豈
復虞繒繳

夏日詠懷

初夏朝氣清綠陰映竹閣好鳥時來集微風散林
薄養疴豐暇日坐卧對雲壑圖書紛几席茗椀常
間錯偶爾屬篇章怡情志簡畧採藥支短筇尋泉
踏芒屨豈曰謝浮榮明志貴澹泊世人逐妄跡真
源誰啟鑰柱史崇虛無金仙戒執著大道本淵微
會心在寂寞矜智適成愚要旨何由度鬱鬱南澗
松百丈巖如削遙望浮雲中縹緲飛白鶴於斯悟
至理俯仰增遼廓

金陵別姜西溟

憶昨桂發時遇子梁谿上攜手遊名園登高共眺

賞我行到白門夜月苦懷想落葉禪房寂忽聞扣
門響相見各歡然秉燭對書幌高樓恣嘯詠古道
互推獎鍾阜鬱嵯峨秦淮平如掌信美非吾鄉茲
晨理歸槳送我大江濱悲歌何慨慷世事本浮雲
素心貴不爽願言各努力庶足慰吾黨

贈李映碧先生

三首

蚤年登朝著端笏拜彤闈抗疏表孤忠旭日麗黃
扉維時甘陵部南北勢相違正色兩不阿嶽嶽世
所希元祐盛名賢黨論多是非玄黃未息戰國是
將安歸惟有哲人在秉道還識幾石室留諫草夢

回尚依稀

魯國遺經火口傳賴伏生九十秦博士典謨亦已
明文獻歸靈光斗杓示景行著述藏名嶽大義何
崢嶸虎觀待鴻儒丹詔下江城老夫難趨走豈敢
抗弓旌抽書授使者卷軸滿巨籟白雲封巖谷時
聞鸞鳳聲

向歆嗣經學彪固續漢史世業重蘭臺千秋誰繼
美先生令子賢載筆石渠裏文藻曜朝華持論平
如水衆人驚未聞庭訓實爾爾余也衰朽姿追隨
愧迂鄙南望東海濱丹霞明若綺願言從執鞭廁

身堂廡底恨無鴻鵠翼翻飛平原里

題張鞠存見示鄉賢合祀傳

昔明神廟時海內正清宴學術半瞿曇文章競藻
絢淮上有張公峩峩邦之彥早季登朝著含香侍
紫殿典禮佐秩宗矯矯人爭羨抗疏定皇儲慷慨
淚如霰藩封宗派清文體為一變權貴咸側目拂
袖歸鄉縣卧看東山雲丹鉛手不倦再世得農部
家學源流衍經術接曲江五車皆貫穿姓字重賢
書才華一時擅對策繼董賈當宁數稱善正值國
步艱中原日飛箭誰為籌軍需飽騰資酣戰辛苦

期報國家憂謝弔唁墨線更登陴江淮明組練至
今鄉閭間童髦頌德徧俎豆並黌宮春秋報祀延
令子當朝傑偕余南宮薦聯轡趨金闕情懷自縑
縑相對二十年尺素無由轉奉 詔徵文學公名
如雷電更有嗣君賢綵筆益葱蒨聯篇復累軸字
字重黃絹父子登蒲輪史冊亦罕見余也樗散姿
甘老農圃賤濫竽何慚惶待放歸耕便相見敘闊
踪示我鄉賢傳再拜仰遺徽偉績何能撰他年過
淮上芳樽或可奠

送黃俞邵聞訃南歸

揮淚向河梁燕山暮凝雪握手送君歸欲語聲鳴
咽定交十載餘千里音書闊今夏再相遇一見驚
華髮君家書盈屋石倉未足埒縹緗充画棟一一
爲我揭編目近七萬真贗俱能別太母年最高賢
明女中傑喜君有良朋美酒爲我設時余憇僧廬
往來無間缺攜書上小舟高吟青谿月樓頭相顧
笑笙簫爲暫歇是時有明詔徵聘到巖穴使者頻
至門敦趨日彌切同人相勸駕君懷獨悒悒向余
垂涕言老母年將耄捧檄雖有心中情難委決惟
母察其情治裝勿使輟讀書逢 聖主致身貴蚤

達何況旁求殷乃自甘汨沒我力尚未衰猶可自
存活君聞母訓言躊躇未忍發遲迴復浹母意
終難越予久臥煙蘿才力最薄劣 盛朝廣搜羅
亦預徵書未先後至京師相期砥素節君文高揚
馬聲名動朝列上卿求識面招邀多賢哲一日過
余邸顏色暗如鐵云具陳情章未得達 天闕出
稿以相示一字一泣血三日不相見麻衣腰垂經
乃是凶問來長號肝腸裂唁賻自元宰走弔冠裳
白余感賢母德淚下不能竭憶昔十年時君表我
母烈大筆真如椽幽冥亦感徹我抱終天恨較君

更慘絕今日送君歸嚴飈正凜冽瘦影何蕭條黯
淡桑乾陌努力慎自愛宗祊一身子母志終當酬
毋使性空滅遙望石城雲愁闔為君結

賦得黃花晚節香

秋氣凜凜露為霜獨見孤英帶晚涼絳葉飄零依
碧澗參差鴻雁滿寒塘碧澗寒塘憶昔日芳枝葳
蕤金莖密雲錦高張霞霧舉遊絲搖曳花欲語過
眼繁華曾幾時百卉具腓今何許寒圃蕭條秋風
淒玉蘂繁香疎逕齊自有高松同晚歲還須竹影
傍清畦獨立秋光甘自媚安能鬪彩桃李蹊况得

長近幽人屋霜根冷枝結幽獨君不見梧桐百丈
宿鸞鳳金井葉飄空碌碌

送陳別駕

自余結茆東澗側往來車蓋不相識使君下馬入
深林高譚蘿薜為生色大幅長篇掛素壁鄰翁相
見各自失平生性僻耽丘壑十年未履郡齋闕知
君為政最風流雪苑桑麻清露濕忽傳使君聞雙
訃遠近父老淚沾臆云昔板輿迎養時萊衣進酒
樂何極高堂忽動枌榆念萬里舟車隨不得馬嘶
嶺上白雲曉帆落江邊村樹黑此時海內尚昇平

遊子南望情嘿嘿一旦烽火照三山關河咫尺分
南北梁園閩海春復秋夢想何由生羽翼今年銀
漢洗甲兵家書纔到顏如墨淚灑庭梧枝盡枯童
叟赴唁路途塞更聞羣鳥百千翎繞署哀鳴聲不
息古來至孝格天人冬筍江魚紀史筆眼見此事
最分明一時賦詠傾鄉國我聞此言歎且泣送君
南陌百端集吳江水碧越山青一路望君情惻惻

長安春日行

錦繡山河千里壯龍文氣結九重開流雲遲日春
光暖御柳搖颺傍露臺京都自昔稱佳麗城中半

是王侯第峻閣重樓夾道懸雲房霧宇相虧蔽上
林更接西山色峰疊翠黛煙凝濕朝霞片片藹燕
關照耀金莖淑氣入九陌三條香雲起萬戶千門
春色裏雕楹銀榜映花紅光射御溝爛若綺是時
王尊坐玉清柏梁賦罷奏咸諷爐燵縹緲鸞旂動
晨旭黃扉瑞靄平詞臣侍從承清宴珥筆數上南
薰殿下直從容歸鳳池傳呼應制文章善只今海
內正消兵滇池劍閣掃欃槍壯士不賦從軍樂野
老惟聞布穀聲

聖人制作追謨誥一朝寮友似嚶鳴微臣竊幸逢

景運願作衢謠隨玉笙

送富雲麓請假歸閩

我昔退耕在南畝先生聞望齊北斗千里贈言古
道存朝夕奉持如璚玖重到承明又幾年追隨劍
珮良非偶朝罷同看太液雲五更聽漏闕門久容
臺政簡畫多閒一卷青編常在手探道欲過羲皇
前論詩不作風雅後 聖朝禮樂繼唐虞夙夜寅
清功不朽月明紫帽動歸心忍上離亭為折柳閩
海迢迢萬里餘勸君更進燕山酒
至尊稽古資元臣官使山中遺壽耆願公且莫戀

雲松經綸黃閣誰當右倘過清溪遇李膺
謂厚菴先生

為問可御蒲輪否
汪鈍翁六十初度

先生家鄰具區澤萬頃琉璃界天白異書捫腹五
千卷海內共推文章伯六經同異識旨歸妙義微
言恣探索往余卧病睢陽城南望茂苑風生腋同
時應 召到京華旅舍蕭條數晨夕史局編摩一
載餘接膝談讌曾莫逆共抽金匱論興衰獨秉霜
毫判心迹扶風筆削詎專長龍門述作無殊格先
生體貌清且癯雙瞳剪水神奕奕閉户文成三百

篇一朝紙貴長安陌塵埃難嬰曠士懷片帆歸向
五湖宅幾回延竚想瑤華路遠何由生羽翮昨年
奉使過浙西迴艫暫作姑蘇客先生高卧聞我來
披衣攜手話疇昔月出三更虎阜曉睥睨千秋興
莫釋扁舟送我上河梁風苦霜清歎睽隔雲山有
約計難成惆悵高天空跼蹐頭白汗青杳無期浮
生浪度竟何益聞君甲子正初周山中樂事良不
易雨後寒煙拂釣竿花時芳艸侵遊屐河豚欲上
紫魚肥子弟門生環講席我欲從之路阻修側身
一望吳江碧

順治九年七月二十日

上駕親出郊外諭遣定遠大將軍敬謹親王及諸

將南征應制

壬辰七月御試

聖主崇文德宗臣事遠征偃戈誠

廟算勤堯豈

皇情為廣薰風化仍期瀚海平曉雲隨

鳳輦秋月近

龍旌湛露分丹禁彤弓錫漢京投醪

御酒徹緝袞軍容清湘野懷征旆滄波待洗兵應
聞旄羽至率舞拜干城

中秋蘿翁齋中讌集

僻巷逢迎少惟君得數過爽秋今正半高友意如
何卜宅門相望論文興不磨開樽臨紫桂解帶掛
青蘿洗硯索新賦分題和舊歌隔離見怪石轉逕
踏深莎樹杪宿鴉動燈前墜葉多舉頭看素魄回
盼失銀河銅漏還傳箭金烏漸耀波百年日日醉
莫自歎蹉跎

省耕

夏甸傳遊豫虞廷重省方恤農煩儆戒任土定輸
將往牒休堪著興時道自長親推迴黛耜祈穀

湯子遺書卷十
卜年芳鸞輅乘春發鳳旂拂曙張屬車連迥陌羽
葆度橫塘郡吏迎僊仗遂師覲袞裳風吹桃葉嫩
雲罩麥畦涼曲水滌軒蓋晴林駐鷓鴣咨詢保介
切申勸耕耘忙

聖澤霑原隰龐眉樂 帝鄉寶岐舍雨翠高穗映
霞黃帳殿看馴雉平田認遠揚實函欣亞旅蔀屋
富倉箱無逸成

天德思艱邁古皇寬徭恩屢紀賜復史難詳
國步登淳古民風躋壽昌舜弦聞愠解堯酒醉衢
康共識氤氳氣永覘歲德祥豳風今繼響奕葉頌

無疆

應 詔

御試恭紀四十韻

虞帝闢門日鎬京訪洛年夔龍賡喜起畢散接班
聯號令多師古聲華重集賢縹緗充 玉几冠珮
秩 經筵天錫圖書秘春呈雲漢鮮體仁功自懋
建極道無前制作開三統清寧撫五弦詩歌諧雅
頌翰藻麗山川游行懷明旦絲綸動象躔鴻儒聚
白虎侍史撤金蓮棧樸功施久鈞陶禮樂全旁招
窮海溘顛俊及林泉薦引寧論地吹噓不計員公

孤方拜讓臺諫復駢肩岳牧搜揚切宰衡啟事連
雲巖鶴詔促谷口蒲輪遄緯度占文耀風雷起蟄
淵渥注空駿馬湘沚絕蘅荃盛舉超曩代曠逢豈
偶緣自當謹舞蹈何敢尚迤邐耆碩推轅固妙齡
儷仲宣朔南咸至止仕隱各無偏爭著京都賦競
裁羽獵篇月分漕輓米日費水衡錢魚媿馮諼食
金差郭隗先霽陽當禁苑芳樹映華旃典禮臨
軒重工寮將事虔瓊階聞曉奏綵仗遶爐煙五字
英才著一經舊學傳文成獻黼幄賦就立花磚
東壁霞光燦少微淑氣纏

龍顏常自喜鳳扇欲徐還不數瀛洲宴儼如紫素
旋同聲稱飲溼野老羨登仙才豈馬卿亞虛承孝
武憐

兩朝感際遇一志矢貞堅謳咏休明瑞祈瞻曆數
延得賢摛漢頌大寶續唐編遜志期宗傳健行望
體乾昭回垂萬禩奕葉奉堯天

院中宿直八韻

清切推丹地瞻依近紫宸龍池鐘漏晚鳳沼月華
新古水流霜影宮雲澹玉津
聖皇開治象元化正含淳幸備班行後叨承異數

頻端貞期拜獻樗散愧冠紳年老才將盡憂多道
轉親夜深星斗闊始悟與天隣

送林玉巖奉使琉球十二韻

水國藩封遠儒臣星使遙鸞章頒絳闕麟繡下青
霄嶺路秋花麗閩山宿霧消前驅陳玉節負弩簇
金鑣到海風常正開帆浪不驕扶桑看湧日蜃市
障迴潮島嶼疑神岳京華認斗杓鮫人迎上客卉
服護仙橈博望通殊域陸生重漢朝文章堪喻蜀
干羽足征苗不數樓船績寧煩銅柱標歸來王會
日拜手聽簫韶

中秋陸處實同年留飲齋中和吳見末韻

二首

相對話平生開樽聽雨聲客中逢令節林下見交
情白社風原古柴桑世不爭從來樂志者非是愛
逃名

別墅仍畱憇竹林笑語聲兒童知客意鷗鷺識秋
情天肯容吾懶拙能免世爭他年重過訪不必更
通名

寄示兒溥

二首

浪跡真無計門庭汝暫持雨多憐稼悞地下慮牆
危官稅完應早鄉租催漫遲近聞文體變前輩法

須知

汝祖墳前樹今年看幾回叔賢書共讀弟幼酒同
杯藥裏宜常曬柴扉莫浪開初冬當返棹候我竹
林隈

西湖聽莊蝶菴彈琴

繫纜孤山下石床理素琴嵐光千嶂滿松影六橋
深古調傳天籟清弦寄道心曲終人亦靜明月照
幽襟

送陳別駕之南陽

送客宛中去行吟驛路紆浮雲高密宅古木叢
戾

廬險隘商顏近士風京洛如此鄉兵火後邑井半
丘墟

家居感懷 四首

濫綴

先朝供奉班平明珥筆侍龍顏辟雍進講華旃
細籍畝親推黛耜旋南國遠通璫海貢西羌不閉
玉門關滄江白髮君門遠悵望高天未可攀
巖關鎖鑰設咸東指顧河山百二雄華嶽峻增高
漢苑渭川波浪注秦宮旌旗閃日貌貅靜冠蓋連
雲蜀道通自是太平多暇日書生何以答皇功

蕭條僕馬南安署日倚江樓眺碧岑瘴嶺朝昏雲
似墨蠻村草木桂成林歸鄉幸慰趨庭志卧病終
違報

主心一葉扁舟還載石片帆風正自長吟
城隅小築避風塵三逕茅齋可寄身藥餌關心朋
舊少青編滿架校讎新傍松疊石平如案裏露看
花折贈鄰崖岸年來消減盡莊生齊物不須陳

立春

冬晴正覺日霜靜風轉俄驚節序新倚檻臘梅香
欲盡隔溪官柳翠先勻時艱可信滄洲穩老去方

知古道真擬待東林鶯語細莫辭華髮醉芳春

春霽友人以詩相投書此謝之

春霽園林暖尚遙石欄殘雪未全消同人詞賦相
投贈把卷吟哦慰寂寥箕斗浮名終是幻巢由高
枕不須招眼看藥筍沿溪綠岸幘披襟酒一瓢

春日即事

次信菴韻

杜門久矣謝繁華不道春光取次奢柳市煙籠含
宿雨桃村日照散明霞舊藏禊帖時開翫新註茶
經可共誇迸笋當階礙杖屨茅軒小逕不妨斜
春日感懷兼呈仲方

漫說登臨春事饒，衡門兩版閉清宵。頻聞白帝烽烟暗，苦憶朱方鼓角遙。憂世何妨同濁醉，畏人真欲混漁樵。袁安小閣知鄰近，箬笠往還不待招。

崇禎壬午闖寇破寧陵，文學翟先生仗節死之。今督學使採輿論祀之，鄉賢余感其事，聊述短章紀之。

成仁本屬中庸事，落落乾坤有幾人。天以三綱作砥柱，士將一死答君親。理無兩路須求是，節到當頭要認真。我至沙隨弔往烈，泮宮俎豆肅冠紳。

新秋雨後抑莊西齋讌集

雨歇林溪煙未收，凭欄雲物見新秋。葉心菓熟紅將綻，階面苔深翠欲流。碁局頻移竹映榻，酒壺好待月登樓。惟君最愛清狂客，塵世何人識醉遊。

京口贈友人

結宇三江紫岫間，薜蘿遶蹬俯澄灣。陸機文賦年方少，陶亮閒情興未慳。花滿芳樽畱素月，牕明綵筆照青山。把君一卷吟蕭寺，夜雨孤燈好閉關。

錫山別賀天士

浪跡湖山求友聲，文章惟爾重西京。一時贈縞多名士，千里傳書動上卿。對酒方驚秋葉晚，登舟已

掛片帆輕莫愁別後雲鴻闊梁苑吳江月共明

東林寺 二首

疎雨松林白鶴棲遠公精舍一峯西青楓雲鎖談
經洞碧水蓮開送客溪法相仍傳阿育記殘碑猶
是晉人題石欄把酒懷元亮煙遶柴桑望欲迷
參差石勢抱禪扉萬仞羣峰帶落暉碧澗淙泓數
磬響白雲縹緲一僧歸閒從苔壁識殘籀靜愛風
泉坐釣磯五老青牛烟嶂外明年策杖莫相違

戊午應 召入都留別里中親友 二首

蕭然蘿薜絕雙魚雲外忽傳有鶴書學道原因息

翻早出山翻悔避名疎幽花谷口遙相映野鷺溪
邊迥自如龍尾班行真濟濟拙庸應許歸茅廬
簇簇郊關擁画輪臨河握手話酸辛藝花選石多
同調待漏鳴珂少故人倦鳥寧能歷遠岫歸雲何
意覆通津入 朝倘得辭簪紱春水還期理釣綸

途中苦雨

西風久雨苦淒迷客子逢人問路蹊遠浦暗雲藏
古寺斷橋平水接長隄當車苦霧征衣濕倚岸高
槐獨鳥啼歲暮可能歸舊隱村鄰濁酒正堪攜
長垣北十里學堂岡有夫子廟相傳四賢言

志處

廟內有党懷英篆書杏壇二大字

柳陌乍隨岡勢轉杏壇忽傍柏林開轍環魯衛行
將老道繼唐虞志未灰蚪蚪文銷存鼯鼯犧尊歲
久剥雲雷階前風雨傳松籟疑是瑟聲入座來

送李子德奉

旨歸養 二首

薊門疎雨淡秋陰惟爾斯行重古今賦就上林纔
賜第表陳東掖蚤抽簪關河落照鄉山迥驛路鳴
蟬野樹深到日高堂應戲綵御香未散遶衣襟
史才經術在關中 詔領羣儒集漢宮瞻望白雲

子舍在拜違黃闕 主恩隆比鄰載酒東臯子 山史

先生戴笠譚詩角里翁 亭林先生回首應憐同調客編摩

寂寞老楊雄

辛酉二月初侍 講筵紀事 二首

文華春殿旭光濃 帝簡儒臣侍九重紫禁天章
詞煥爛紅雲寶幄語從容細旃風定牙籤啟袞袖
香飄玉珮從典學千秋際 聖主微臣何以稱遭
逢

御氣氤氳繞 玉皇西清霞彩映 龍裳經陳謨

典 天心正學闡勲華 帝道昌敢向 盛朝稱

管晏何須文藻繼班揚恩深覆載安能報誦讀衡
茅志未忘

擬

上賜大臣遊溫泉詩 四首

山陵疊翠倚層霄瑞靄晴臨碧澗遙石上泉聲隨
玉漏巖邊樹色映金鑣雲峯遠結盤龍氣瀑水近
當踞虎橋一奉

恩榮歌鎬燕長從仙蹕聽簫韶

碧潭波遶翠微迴帳殿紅雲覆綠苔閭苑烟深朝
絳節華清春曉對蓬萊山光獻壽天杯永寶翰騰

輝 御榜開萬國共瞻隆孝治漫言驪阜重仙臺

傍巖依岫敞離宮 詔賜恩波卿貳同閣道周迴

香溜裏衣冠趨步彩雲中不須雕斲傷元化惟有

真淳表 聖功何事露臺誦漢主萬年儉德仰

皇風

薊北烟蠻俯大溪甘泉春色接丹梯曉來嵐氣當
牕入雨過花光拂座低搖曳霓旌依礧轉參差豹
尾與雲齊願將景物同民樂薄海烝生望紫泥

人日

椒花彩勝懶隨人閉戶攤書笑此身白首校文嘗

午夜寒天點易及霜晨節遲
時未立春郊柳應含凍雪
少村梅可放春稍待西山芳草綠招邀朋輩醉芳
辰

題畫

秋林不厭靜高士自能閒鎮日茅亭下開窗對遠
山

西來菴題壁

禪門深鎖萬松間江上白雲自往還雨過捲簾無
餘事一編周易對焦山

西來菴贈水齋上人

上人舊為寧夏總兵

白馬西來掃野雲居人誰識舊將軍楞嚴讀罷焚
香坐一鉢江泉到夜分

戲贈

飯辦松花芰辦衣同羣鷗鳥渾忘機駝岡不減柴
桑社擬剪蓬茅待汝歸

贈懷慶太守

二首

野王山路曉雲橫一水滌迴繞郡清兩岸柳條凝
露濕年年常見使君情
西門古廟鄴城陰父老笙簫直到今見說行山青
似黛濟源爭比濁漳深

詩餘

賀新郎 秋思

雨脚纔收了竹簾開梧桐墜露淡煙如掃一派秋
聲吹木末况漸蘋衰楓老問今歲秋光多少貫酒
東臯凝望眼看浮雲變幻入林緲思疇昔縈懷抱
空江採得蓴絲好擢輕舸遙峰隱約放歌霞表
世事渾同蕉鹿夢擬向華胥醉倒更說甚桃花源
杳白恰青鞵尋釣侶待月生一笛驚鷗鳥悲歡話
付溪草

滿江紅

後池千葉蓮
盛開漫賦

藕葉鋪池連陰雨溪流青漲東里叟扶筇還問後
渠無恙隨地菰蒲雙鷺宿垂楊半掩波紋上碧烟
開映曉弄新妝輕盈狀 廬山社幽情漾湓浦岸
清風宕似層層紅艷美人堪餉月下時聞芳露滴
呼兒學作漁郎唱夢醒來十里野塘中遙相望

千秋歲

八月十六
日夜玩月

暮霞成綺又送冰輪起花影裊簾波細輕清河漢
色珍重嫦娥意今歲好今宵賒取明年醉 玉笛
情堪寄雲母屏還倚瓜再削盃重洗紅牙翻舊譜
妙舞風吹袂澄露滴盈階桂落天如水

滿庭芳

秋日閒居

雲澹霜洲鴈飛葭浦兩行
煙樹柴門紙窻茅屋秋
氣映朝暎壯歲歸田作賦
十餘載高卧丘園漁樵
伴時來問訊紅葉認山村
漫論古今事柴桑谷
口往跡猶存但茶香竹裏
酒沸松根午榻清眠夢
覺看籬畔菊菜堪殮凭欄
坐南華一卷朗咏到黃昏

湯子遺書卷十終

附錄

行畧

孤子湯

沈溥泣血述
準

先考諱斌字孔伯號荆峴一號潛菴先世為滁
州之來安人始祖諱寬從明太祖起兵積功至
廣東神電衛世襲百戶子諱銘調中都金川門
百戶再傳諱庠以功陞睢陽衛前所世襲千戶
遂家焉三傳諱英襲衛職四傳諱卿以平巨寇
王堂功陞世襲本衛指揮僉事累功至驃騎將

軍中都正留守五傳諱易以功至明威將軍陝西岷州衛守備是為府君之高祖子三次諱希范以貢生任山西趙城縣縣丞是為府君之曾祖子諱敏為州庠生即府君祖也孝友寬仁於兄弟族人篤愛無間言與人終身無忤色又嘗以千金赴楚為趙城公購棺木比至歲大饑遂傾囊賑之再往始獲木焉子四人我祖其季也祖諱契庠生慷慨明達凡大義所關介然不撓鄉黨間每有所疑或地方大事就正者輒片言立決府君既貴惟諄諄以忠孝相勉勵

誥封中憲大夫陝西按察司副使凡三為鄉飲正賓崇祀鄉賢子二長即先府君府君自幼不好嬉戲八九歲時耆儒王先生慕祥開塾講小學人皆憚其嚴正府君獨侍坐終日無倦容歸即見諸行事遇貴胄輿馬赫奕者泊然不以動念王先生嘗謂先大父曰令子真大器也為制舉義嘗不起草宿儒多遜不能及平日讀書外無他嗜家貧常借人書篝火讀達旦率以為常年十六就傅北郭外李自成寇睢城府君聞變奔還城已閉乃繞濠痛哭先大父及先大母趙恭

附錄
人遣人從城上語使去府君不忍遠違伏近郭
外斷蓬坑中時州守遁民開門納賊先大父負
曾祖母而逃府君聞賊入城冒難奔赴至則先
大母已罵賊膺刃歿矣府君號泣不欲生絕食
者六日先大父強之乃食既殯隨大父避難河
北舌耕以養既而伯祖賁皇公卒衢州有弱息
留衢大父率府君往欲攜之歸而李自成破北
京乃寓衢讀書山中每念先大母苦節恐不聞
於世益自刻苦嘗中夜大哭哭已復讀夜深虎
羣嘯林外與書聲相間久之山中民皆感動時

時來餽燈油米食府君却不受日焚敗葉繼晷
飲泉水咽糠粃而已尋至南京以流寓應試七
試皆冠軍已而有令納軍需數兩方許入庠遂
棄去乙酉

王師定中原乃由江西汎鄱陽歸丙戌補弟子員
戊子舉於鄉己丑會試中式壬辰成進士

世祖章皇帝親試擬

御製大清會典序及送敬謹親至南征詩改弘文
院庶吉士邸舍不蔽風雨開閣讀書不妄交遊
甲午授國史院檢討學士山陰胡公兆龍欲屈

致一見終不肖往乙未

詔選翰林科道出任監司府君名在選中有品行清端才猷贍裕之

諭以應得職銜知一級用明年補潼關道副使潼關自明季亂後民多逃竄城中不滿三百家是時

天兵下黔者屯成都漢中而經畧洪公屯湖南征調轉輸之衆必經其地官吏科斂以辦軍需驛遞重困府君戒屬吏曰毋科取民財毋妄用驛夫兵來吾自應之自是大兵將至府君使人迓

之境外與申約束曰部文所需有不給者公請劾我若於額外動民間一草我亦當論公是後兵至肅然無敢犯者屬吏皆兢兢奉法撫勞備至再閱歲關城中流民歸者數千戶府君見鄉大夫惟問民疾苦及興革事宜有某公比日三謁無所言府君甚異之後聞其甥與人爭產欲為私請既見終不敢出口也行保甲有盜即獲自是四境晏然又患民風强悍為設學講律有兄弟相訟者府君收其詞不問令於講鄉約時必至凡三至涕泣自陳悔過遂出詞還之卒相

友愛府君去時猶追送數百里也順治十四年
恭遇

覃恩階中憲大夫封先大父如其官贈先大母恭
人府君心稍慰戍戍撫軍陳公薦於

朝時在任未三年民愛之如父母偶因勘荒行屬
邑遇雨止大樹下既去民以朱欄護樹時人比
之甘棠云己亥陞嶺北道叅政轄贛南二府為
治一如潼關時甫三月清積案八百餘件贛據
四省上游地大山深亘稱巖疆有李玉廷者為
明舊將以本部萬人入山為盜府君過南昌巡

撫張公屬之曰贛寇非君莫辦勦撫惟所為府
君至以手書諭之遂許降約入山自招之未及
期七日而海寇犯江寧報至府君夜見贛撫蘇
公請檄將士嚴城守且曰玉廷許降非心服也
今必變矣某勅文當駐南安南安無兵必先被
寇請往夜馳至郡設守甫畢而寇果至見有備
驚走曰湯公預料如此何可當也遂散兵焚掠
府君與撫軍密計擒玉廷其弟秀廷以衆降當
玉廷之初叛也邸報斷者九日人情洶洶訛言
江寧失守蘇公將調兵防灘府君策海寇陸戰

必敗訛言必玉廷爲之欲分我兵力耳蘇公遽起執府君手曰公言是也會捕得海寇謀者蘇公以屬府君一問即承撫軍曰此當繫獄候旨府君曰今人心搖動請

旨往返萬里脫有變奈何遂即斬以

聞數日報至海寇敗又平南王旗軍孫大市馬過南安殺二人其帥董遊擊誣被殺者以盜問官僅擬鬪殺律平南王怒曰所殺者盜也當勿論切責南安守及推官皆錯愕不敢問乃援

赦例以請時府君初受事白撫按曰勢相敵者謂

之鬪孫大持刃在營身無寸傷而民以兵死擬鬪不當乞自審一訊得實大止殺一人其一乃陳報國殺也遂坐大斬而申請平南索報國回稱報國攻文村死矣然大竟抵罪一時旗軍畏服無敢犯者先是府君由潼關移任便道省親值先大父病血痢欲留養例不可抵任時遂憂思致疾會軍興力疾視事賊平具呈乞歸督撫按皆難之駁再四府君狀報曰某母趙氏壬午殉難最慘已負終天之恨赴任時歸省某父抱病馬首南馳方寸已亂留之終無益於地方且

老父聞某病病必劇是某貽悞巖疆不可為臣
病貽親憂不可為子也巡按見之惻然乃代請
予告時年三十三矣是行也不孝溥方九歲與母
俱未從先府君攜二僕往返八千里平盜患有
馬一匹歸時鬻之充資斧百姓扶持相送莫不
歎息泣下甚有痛哭者歸侍先大父色養備至
繼大母軒愛府君如已出府君竭誠盡孝亦無
異所生每日暮先大父遣就寢猶讀書至夜分
不輟後課不孝溥等亦然曰吾非望汝蚤貴少
年兒宜使苦苦則志定將來不至失足也授四

書外授尚書已授昌黎文百篇漸及史漢先儒
諸書最後課舉子業曰汝將來長成吾未必及
教汝先畧讀諸書知大義庶無廢業嗚呼府君
之為不孝等遠慮如此今追憶之其何能不仰
天長號耶居之西百步為先大母趙恭人祠每
朔望謁家廟畢必至祠肅拜數十年如一日甲
辰先大父卒府君哀毀骨立席藁柩旁晨夕號
慟既葬數日一省視墓樹數百株一枝損必歛
獻不置每遇先大父大母忌辰輒素服終日色
慘然不樂即至起官後亦題別主自隨雖事至

附錄
叢劇不廢展謁為幼叔延師教誨冀其成立曰
以竟吾父未竟之志也嘗受業孫鍾元先生之
門先生亟稱之作詩以贈行居家閉門郡守罕
識其面今浙江巡撫金公鉉與府君同年壬子
任河南布政使相別二十年見郡守問府君對
言睢州未聞有此人也金公以是益重之會
上諭舉外官告病者州守程公以名聞金公力主
之府君以母老懇辭者三事乃已乙卯

上諭舉賢才赴軍前大學士熊公賜履詢之魏公
象樞曰吾曩見某文久欲薦之然未謀面魏公

曰此山中學道人也舉之誠當顧其家貧甚不
能治裝奈何遂止戊午

詔舉博學鴻儒於是魏公金公交章共薦郡縣迫
之行乃駕牛車入都止僧舍中日杜門危坐未
嘗輕謁顯達既試

上親第為甲等部議以原官脩明史

上命補翰林得侍講編纂日無暇晷為明太祖本
紀四卷列傳十餘卷辛酉克

日講起居注官尋轉侍讀典浙江試所得皆孤
寒士雖下第者皆嘖嘖稱道事竣即行撫軍李

公本晟留之終不可壬戌充明史總裁癸亥五
月始日值

講筵纂脩

兩朝聖訓五鼓入 朝講畢侍

起居歸則裁定明史成曆法天文志及英景憲孝
四朝列傳考訂期於確核時方酷暑汗流浹背
不懈也每日暮正襟端坐潛思經義以備詰朝
進講不孝溥請稍息府君不聽曰此

君命也是年歷左右庶子嘗侍立

上顧問汝平日有詩文乎其繕寫以進歸寓朝服

手書越日即呈

御覽

上召至乾清宮語良久始出嘗

恩賜緞紗先捧至大父主前再拜仍寄大母以榮
君賜甲子超擢內閣學士兼禮部侍郎在閣凡四
月公事外未嘗與大學士接語會江寧巡撫缺
廷推孫公在豐

上特擢授陞辭

上深加獎諭

賜鞍馬一綵緞十白金五百兩比行又入見

上撤御饌賜之復

賜御書三軸曰今當遠離展此如對朕也時

上將南巡乃星馳赴任受事後文案山積數日即迎

駕北去乃就舟中批發晝夜不假寐者六日既見上於淮安城南

上顧問慰藉備至遂前驅至蘇蘇城道極狹制府將毀舍廣馳道府君曰如此則數萬人無所安息非

聖天子問民疾苦意遽下令止其事

上至府君扈

蹕至江寧

上再賜御書一軸蟒裘一襲羊酒珍羞回

鑾日傳

旨令徑歸署時蘇松賦重積逋相仍官不滿三歲輒罷以故皆不自愛而私規近利上官陰持其短索賂益急虧庫金繫獄者纍纍富商大賈聚處都市以侈靡相競男婦冶遊巫覡奉妖祠飾怪惑衆民日趨奸利訟師主誣詞興獄輕猾少年懷刃嘯呼主打降畧識字則造淫詞邪說或

附金
結旗丁為主契券以奪平民或盤據各官署舞
文法累世相承以擅利淮揚十年昏墊民不聊
生號稱難治府君至則進州縣吏謂若等以金
事上官本為巧宦計今官斯土者既絕意陞遷
尚何復冀而以庫金媚人顧汝等或為所脅今
與若更始苟稱職吾力或能拔汝即不能以考
成罷歸猶得守墳墓樂餘年奈何日坐堂皇引
前官妻子勘產顧反蹈所為皆頓首涕泣曰公
活我又戒司道府官不得責屬吏餽皆指天自
誓曰謹從公令於是除耗羨嚴私派清漕弊省

獄訟汰蠹役杜請托行保甲革鹽商匣費一切
皆以身先數月劾其不奉令者已又劾其陽奉
而陰違者於是屬吏爭自濯磨制府以下相戒
不受撫屬一錢奉使京朝官迅棹疾過地方官
未嘗餽斗米吏治大清府君愛民出於誠為政
以寬民力卹疾苦興教化培植根本為務嘗請
改並徵積逋為分年帶徵免十八十九兩年災
欠減賦額寬考成豁逃丁調驛困免蘆課買銅
除邳州版荒捐明神宗朝所加九釐餉前後疏
數十上部議或從或否而府君未嘗以數為嫌

聞有災傷輒通夜不寐疏立拜發初至報睢寧
沐陽邳州災蠲賦數千兩又報泰州災并蠲前
二年賦且入永蠲案内次年淮揚徐大水奏報
免賦十餘萬兩又盡免高郵寶應等州縣賦復
幾十餘萬發常平倉粟及丐將軍提鎮權關輸
粟往賑又檄布政司以庫銀五萬兩告糴江西
湖廣先發後

聞或以爲不可府君曰候

百然後告糴民皆溝中骨矣吾寧先發金脫格部
議以所糴平糴足償庫何患乃遂遣兩府同知

往誠曰若至極陳淮揚災狀言米斗一金購及
半運還俟後令已而大賈爭集淮揚斗米百錢
而已後鬻米償庫

國帑無損而民賴以活者數十萬有司請報湖
蕩蓮茈府君駁還曰朝廷任土作貢未聞問諸
水濱老吏叩頭以例請府君曰例自人作寬一
分則民受一分之賜且蓮茈歲或不熟一報部
即爲永額後欲去之豈可得乎又禁冶遊崇儉
約驅優伶懲豪猾淫詞邪說馬弔博具一切皆
絕又禁有喪者不得火化及久不葬比一歲報

附錄
葬者三萬餘棺有五通神者江以南崇奉數百年禍福立應歲娶民間子女為婦所娶婦皆立死遠近奔走如鶩督撫初至謁畢然後受事府君取其像投太湖中民大駭已而妖遂絕廣立義倉社學聚生徒講孝經小學月吉講

上諭律令民間凡所為稍不法者輒恐府君知風俗大變時民見吏胥皆奉法惟謹權貴絕口不敢請託而民用日省乃因府君姓為諧語曰黃連半夏人參湯也又以自奉儉約謂之豆腐湯云吳縣監生王某者文恪公裔也有奴竊貲逃

數年矣突引弓刀數十騎來自稱鬻身親王府詬罵索金錢官吏莫敢呵問以告府君立收送獄中論如法又常熟縣奴某持其主之父國初受隆武劄迫主遠出欲據有主婦府君廉知大怒曰國家屢更大赦此草昧時事何足問而豪奴以脅若主乎拘到追劄付火斃之杖下百姓莫不稱快時海禁初開浙江提督請遣將巡海中捕盜

詔下四省議府君議曰盜聚然後加兵今兵加何所而輕遣將徒使寇掠海中為賈買患久之必

成畏途今當靜以待動無為事先督撫多如府君言議上遂止故事印官委署由布政使擬送頗有用賄得者府君謂未任而先有所費何以責廉今掣籤如選例或請府君講學府君曰盡吾職即學也今人以講學釣名墮本業而長奔競吾未見其可也或請為府君立書院府君曰吾不講學安有書院比者功令禁生祠所在稱構書院籍斂父老財飾偽長奸吾甚不取乃下令嚴禁吳有隱士徐枋者居西山下四十年人罕得見府君重其品節欲因以勵頽俗嘗屏驪

從造其門枋終不肯出久之府君乃去時人兩高之夏月蚤盛從質庫贖敝苧帳以自覆錫山泉名天下府君竟任未嘗酌杯水朔望謁廟屬吏至不敢代市辦香署中秉燭治事夜四鼓始假寐日中始食自此心血枯槁嘗顧謂溥曰古人云食少事多豈能久乎已而曰

君命即天命也一歲嘗四至淮上冬夜乘小漁舟渡江幾覆北風凜冽背痛者數日歸值歲終封印猶晝夜拮据見屬吏必反覆丁寧告以君恩不可負民命不可殘諄諄如家人父子一時

政績卓然而府君意猶未愜蓋經營厝設十未竟二三且曰吾自信者心耳安能保其必當乎時一切當奏聞者皆有期會過則奪俸江蘇所屬北至豐沛千二百里兼按察司在江寧相去復五百餘里殺人及盜質審動輒逾限故往日事非不得已不奏府君曰是欺也且奸盜復何畏乎乃悉具奏雖罹罰不恤然每奏罰輒荷恩破格寬免府君之初受事也值蠲漕四分之一既而請分年帶徵或以為柄臣功先後索金四十萬府君禁使勿與屬吏以民願輸告曰公不

應仇公必甚府君曰民有錢寧不以輸國賦而入私門乎吾寧旦暮斥罷歸田畝誠不忍見若等剝民媚權貴也將按發窮其事屬吏叩頭謝罪良久乃已當是時天下爭輦金錢入都而府君屬無一人往者屢有求皆不行乙丑秋戶部因奏銷劾府君吏部奏奪俸六月上復特免比大計藩臬空手入都都門索府君一刺不可得莫不竊恨然以上知府君深無如何也丙寅春皇太子將出閣

上諭吏部自古帝王諭教太子必簡和平謹恪之
臣統領官寮專資贊導江寧巡撫湯斌在講筵
時素行勤慎朕所稔知及簡任巡撫以來潔已
率屬實心任事允宜拔擢大用風示有位特授
禮部尚書掌管詹事府事聞

召即議行蘇城罷市十餘日外郡之民亦接踵至
日聚轅門外號泣伺府君出羣擁馬首甚欲閉
城填巷又設數匱斂錢為路費將叩

闐一日匭遽滿府君曰

詔旨寧可違乎委曲宣諭乃得行及行送者十餘

萬人自蘇至六合不絕於道府君念大母年老
乃便歸省視會

皇太子出閣屆期兼程北來既見

上

上喜甚問路所由具對因奏鳳陽災狀且言徐州
雖已荷

恩蠲賦比入春尚苦饑

上遽遣官往賑活者無算

上問下河事下河者本減出河中水由高堰漕隄
諸壩入高郵寶應興化泰州泰興山陽邳州沐

陽等州縣田廬皆沒

上諭開渠入海以居黃河下故謂之下河初安徽按察使于公成龍督理下河估金八十萬兩時于受總河節制以圖議上而總河靳公輔剝其議曰吾以勾股法測潮高內水五尺河開必內灌法當築丈五尺隄起高堰屬之海盡收各壩水入隄束高丈餘則潮不入而隄外可盡為平田須運土三百里外築圍水中涸取圍中土築隄非三百萬兩不可隄成墾涸地為田鬻之民以償庫

詔靳于廷議未決於是

上遣工部尚書薩公穆哈侍郎穆公成格會漕運總督江蘇巡撫詢問民情民畏靳公多言願罷工者府君曰是不可罷也上水日增而下無所洩不十年無淮揚矣靳徒以海內灌故異議海可內灌寧俟今日且吳淞錢唐皆有潮何獨淮揚而慮內灌乎今兩府蠲災外賦不滿三十萬不若請盡乞民令有司督民自開河薩曰公言良是第奉

詔問民疏中又可入公語耶某見

上當面奏矣及見遂不奏至是府君具對如前語
上詰問薩等辭服皆革職自是忌者衆矣是時于
已擢直隸巡撫乃更用工部侍郎孫公在豐往
督之孫至言開河三便旬日下河水驟長疏鑿
難施

上召靳公至

面諭塞河南岸及高堰壩靳堅不肯從曰壩塞隄
必潰府君力爭

殿上已又及九卿爭午門外凡兩日絀其議竟閉
減水壩一年時

上特命府君行坐講禮尋充

經筵講官未幾復總裁明史已更兼詹事官與會
議屢蒙

垂問

恩禮殊異人固忌府君且大用而府君所執又數
與要人忤因共謀誣府君誹謗構陷百端一時
仰其權勢貪其賄遺者皆從而揚其波賴

上聖明終不信也丁卯五月因旱

上使內閣聚問九卿興革事宜府君請復夏秋兩
稅及罷蘆課買銅曰春種未布而責民輸賦此

獲盡一歲之入以償債且不足以故凶歲多逃亡逋賦豐歲亦不能有所儲蓄曩者國用不足取濟一時今

內帑充積如山何不復夏秋兩稅使勤農者有所積雖水旱不為災不國民兩利乎至若蘆課新例並令買銅銅非市所常有權關終歲專購猶患缺額奈何責職民事者辦此此不科取均貼必責成蘆戶不若仍聽輸銀便時戶部某公遽起曰公休矣即欲變此法俟某去戶部乃可今不能也遂罷會會五官靈臺郎董漢臣言十

事忤閣臣意御史劾漢臣越職言事希富貴內閣欲因下刑部究主使

上問九卿獨府君白漢臣無罪已內閣復稱

旨傳問府君未對某公目府君曰幸勿違衆議府君厲聲曰

上因早求言漢臣應

詔言事何罪大臣不能言反罪言者如此心何某大慚自是恨刺骨居一二日

上幸海澱有輔導

皇太子之命數日病具疏辭內閣欲因之加罪

上不聽第責令回奏而彈者累章迭上然亦不能有所指

上輒報聞而已比府君回奏事輒已會詹事府復劾府君薦耿介老不稱職部議革職

上薄其罰削五級留任而忌者愈益怒謀中傷益力日夜叢謀必欲擠之死地人或告府君當防患者或勸府君委曲使人請諸公為解者府君笑曰吾生平以義命自信且年逾六十復何求時抱病杜門伏枕讀朱子文集丹黃點注無異平時

上終察知府君孤介不容於時

特遣御醫診視尋

命改工部尚書是日九卿會議府君入講不至科道即又劾府君部議降二級調用吏部尚書陳公廷敬爭曰比者某等失朝從嚴乃奪六月俸何至是然竟不能得

上復命留任先是府君留溥等代養是年七月不孝沆來都九月聞府君病不孝溥亦來府君見溥等心頗喜曰我昨病幾危

上遣御醫診視今漸愈矣吾勢不能去倘不即填

溝壑猶當勉報

君恩顧汝祖母年迫桑榆心中若割奈何不孝溥
恐府君心慟乃詭詞應曰祖母近稍健故某來
耳府君大喜曰若此母子相見尚有日也居數
日奉

命詣潞河勘楠木越三日抵暮歸感風寒微嗽言
笑如平時漏下二鼓猶戒不孝溥等曰孟子言
乍見孺子入井皆有怵惕惻隱之心汝等養此
真心令時時發見久之全體渾然便可上達天
德若但依成規襲外貌終為鄉愿無益也又粗

問里中事歎曰吾少年交遊零落盡矣問夜何
其乃就寢曰明朝尚會議也不孝溥等就枕展
轉不能寐聞府君嗽聲轉急披衣起視則喉中
有痰疾呼尚能應頃之遂卒嗚呼哀哉天何不
殞滅溥等而奪吾父之速耶家無新衣敝衣以
斂束貼金銅帶加朝服其上朝服緞即

上賜也嗚呼痛哉

上聞遣學士多奇翁叔元以茶酒賜奠命馳驛回
籍照尚書品級

頒賜祭葬皆出自

附錄
三
睿斷非閣臣擬

言也在京師弔者莫不盡哀扶櫬出都道旁騎者
多下馬拱立歎息以為難得所過州縣莫不致
祭入睢境紳士父老白衣冠涕泣郊迎者近萬
人相與扁其柩前曰忠臣孝子雖兒童婦女莫
不唏噓沾襟也府君剛毅介直忠孝原於天性
篤志聖學潛脩默證內體諸心外見諸事平易
確實不慕高遠克勤小物未嘗放逸於性命之
淵微造化之精奧雖探討窮索而必以日用倫
常為可據於古今之治亂事機之得失皆綜貫

會通而必以誠意正心為有本生平無戲言戲
動好學深思隨事體認天理久之愈益精明遇
事坦然泰然有自得之樂明於審理而不惑利
害循分自盡而不希名譽因事善處而不執成
見見義勇為而不繼後功處紛錯心常寧一遇
患難神色閒定當幾立斷而未嘗後時窮達一
致而廓然無累自治甚嚴而待人甚寬宅心平
恕而守法不阿遇卑賤而不侮對權貴而不懼
溫然而不可犯侃然而未嘗激故其居官也未
嘗有所與於人而人愛之未嘗有所威於人而

人畏之僚友不言而咸服百姓聞風而革心雖
頑梗黠悍之徒沉迷膠錮之俗莫不令之而即
行教之而輒化間有貪墨之吏強暴之徒不得
已見之彈章加之刑憲者亦未嘗不以府君為
仁人也人皆知府君剛正廉介卓然有壁立千
仞之操而其所以感之而立應既去而民不能
忘至誠惻怛痾瘵一體之心有潛入人而人不
覺者世或未之知也生平居無廣廈出無文軒
家無侍姬食無珍羞吳署多隙地春月薺生日
採食之不厭不孝等嘗從容陳說以為何太自

苦府君色戚然不答不孝等數數言之泣然流
涕曰吾非欲儉汝祖母未殉難時日食粗糲我
未逮養故也生平無雜學因先大父病始學醫
卜葬地學堪輿占易以象象為主常曰易非教
人趨吉避凶祇審理之當否其進退存亡介在
幾微間非沉潛玩味不能得也人有一言中理
者輒心推遜之且終身不忘聞某處有賢人及
文學之士嘗以不見為恨見四方人必問其土
俗民情遇節孝孜孜惟恐其沉沒所至興學育
才成就為多至人有負已者過則輒忘不留於

心在林下時或勸之著書曰學貴日新今之所
是異日未必不以為非何敢妄為及再仕雖欲
為之不暇也故著書最少所著有洛學編二卷
補睢州志五卷詩文二百餘首公移條約約十
餘卷未盡行世今江南常州府奉祀道南書院
蘇人特建祠於學宮有司以時致祭惟謹而紳
士復肖像於懷嵩堂中歲時瞻拜數郡畢至里
中從祀鄉賢建特祠奉烝嘗焉府君生於天啟
丁卯十月二十日巳時卒於康熙丁卯十月十
一日卯時享年六十有一配我母馬氏封恭人

州庠員鄉飲正賓諱中駿公女子四長即不孝
溥廩膳生員娶王氏壬辰進士江西提督學政
僉事諱震生公女次濬廩膳生員娶袁氏國子
監監生諱賦諶公女三沆廩膳生員娶宋氏巡
撫江西都察院右副都御史諱榮公女四準娶
侯氏辛丑進士中書科中書舍人諱元棊公女
女三長適己丑進士廣東韶州府知府趙公諱
霖吉子監生登先府君卒次適己亥進士湖廣
當陽縣知縣李公諱遙子廩膳生員中三適廩
膳生員張公諱銘鼎子生員淑文俱馬恭人出

孫五扶光聘丁未進士山西懷仁縣知縣崔公
諱九嶷孫女廩膳生員諱玳女光裕聘江西提
學僉事王公諱震生孫女候選州同知諱組女
傳臚聘當陽縣知縣李公諱遙孫女監生諱初
女俱濬出進賢聘壬辰進士江南鎮江府海防
同知吳公諱淇孫女監生諱學頤女長真幼未
聘俱沆出孫女七長適當陽縣知縣李公諱遙
孫監生初子窠次適戊戌進士戶部右侍郎王
公諱遵訓孫考城縣儒學教諭諱光臯子生員
肇煒三許字庚戌進士原任內閣中書王公諱

錚孫監生諱涵子采俱溥出四五六七幼未許
字四五七濬出六沆出康熙二十八年十月四
日奉窆於州城東南棘故城

賜葬新阡不孝溥等苦由昏迷中和淚濡毫語無
倫次惟冀大人君子哀而賜之銘感且不朽

墓誌銘

長洲汪琬撰

康熙二十六年冬十月十一日工部尚書睢州
湯公斌薨於位年六十有一公之病也

上遣御醫診視及薨又

遣滿漢學士漣酪奠公柩

命其孤馳驛護公喪歸

詔予祭葬如故事訃聞於吳先是公嘗駐節吳中去逾年而吳人追思不忘為公建生祠於學宮至是會哭祠下者數千百人悉號慟失聲有識謂數百年來自周文襄王端毅兩公而外巡撫未有如公者也而前公巡撫江南者方柄用勢燄張甚忌公聲望出已上又嘗以事徵賄鉅萬於吳有司有司議率民財以應公禁不許遂銜公刺骨公既去吳還

朝

上眷注益厚忌者日夜用蜚語讒公於

上前必欲擠諸死地賴

上神聖稔知公無他公故得保功名以終殆公捐館舍未逾月而忌者事敗踉蹌出都門凡都人士訖吳中父老子弟咸指斥夫已氏姓名戟手相詬詈以其媒蝮公故也由是朝野公論始大白而公之志不獲伸於地上庶幾其伸於地下矣越明年諸孤將卜葬州東南黃岡之阡先期遣使以書及行狀來請銘琬嘗與公同為史官又辱知交最深乃核其世次官閥事行之實序

而銘之謹按公字孔伯別自號荆峴晚又號潛菴先世由滁州之來安以軍功爲金川門世襲百戶其後調睢陽衛遂家於睢後又以功世襲指揮僉事五傳至明威將軍岷州衛守備諱易者公高祖也曾祖趙城縣縣丞諱希范祖州學生諱敏考州學生諱祖契以公賢封中憲大夫陝西按察司副使妣趙恭人李自成之亂恭人被執罵賊不屈死琬嘗文其祠堂之碑繼母軒太恭人公少不好弄稍長益以學自奮於書無所不讀而尤好習宋諸大儒書年甫踰冠舉順

治戊子科鄉試明年會試中式越三年成進士改弘文院庶吉士授國史院檢討時方議脩明史公疏言宋史脩於元至正而不諱文天祥謝枋得之忠元史脩於明洪武而亦並列丁好禮普顏不花之義

陛下應天順人而元二年間前明諸臣猶有未達天心抗節以死者似不可槩以叛書乞頒寬宥之

詔俾史官得免瞻顧則諸臣幸甚政府見公疏不悅

世祖召至南苑慰勞再四於是聲譽大著居無何
詔選翰林官任監司俾習知民事以需大用公與
在選中出為潼關道副使於是中原初定
王師方下滇蜀關中當用兵孔道征調往還者
旁午頗驕橫不戢民間苦之加以差徭煩重相
率竄走山谷公戒屬吏毋科取民財毋妄用驛
夫兵來吾自應之已而駕馭有法來者悉奉約
束惟謹不三年流民歸復業者踰數千戶關中
多盜公嚴行保甲法量地遠近俾民間各設鉦
鼓砲石盜至即以次傳警頃刻數百里近者赴

救遠者各扼要地盜故不敢發發亦輒得所屬
遂大治陞嶺北道叅政公治所在贛贛四省上
游地穹山深箐大盜窟穴其間時時出肆焚劫
值海寇犯江寧贛人騷然各洶洶思亂公密陳
方畧於上官擒盜魁一人誅海上謀者一人及
城中姦民與盜通謀者又一人而貫其餘黨贛
人以靖上官方倚公如左右手而公念其父中
憲公竟乞假歸矣自是里居將三十年性故廉
介補衣素食怡然自適官吏不知公者或相凌
侮亦置不校也中憲公服闋聞孫鍾元先生講

學蘇門賃驢往受業門下每質所疑先生亟稱之歸而所得益遠所行亦益力屹然推中原巨儒舉朝賢士大夫交口稱說以薦舉復起

御試甲等補翰林院侍講與琬輩同入史館充日講起居注官尋轉侍讀出典浙江鄉試還充明史總裁官既又直

經筵纂脩

兩朝聖訓公在

上前進退翔雅敷陳詳盡深契

上意超擢內閣學士兼禮部侍郎遂以右副都御

史巡撫江南陛辭之日

賜鞍馬綵緞白金五百兩繼

賜御書三軸諭曰展此如見朕也其眷注多類此

江南故習奢侈而吳中尤甚服食玩好多不節又喜蒲博諸戲歲時婦女爭炫粧冶服嬉遊山水間以為常而市井無藉子率尚拳勇用鬪毆恐惕民財事急即恃勢豪為囊橐不可究詰其尤無良者則鬻身旗下借以脩故釁公悉禁止不少貸素多淫祠事楞伽山五通神尤嚴甚寒劇暑載鼓吹牲帛往賽禱者駱驛相繼奸巫淫

尼闡入人閨閣競相煽惑吳人以是益困公廉
得其狀躬至五通祠取土偶投諸湖中衆始大
駭久而又大悅服為政簡靜然下令期於必行
賅吏蠹胥悉搖手屏足相戒不敢犯重脩泰伯
祠朔望必往躬謁又謁范文正公及周忠介公
祠以為衆勸數親詣學宮命諸生講孝經俾幼
穉悉得列坐以聽拊循細民若惟恐傷之者吳
俗自是大變雖窮村僻壤莫不感頌其政里巷
因公之姓至以諺語呼公清湯云公屢上疏訴
吳人疾苦請改竝徵積逋為分年帶徵請捐十

八十九兩年災欠請除邳州版荒田賦又請捐
明神宗朝所加九釐餉又請免淮揚徐水災諸
州縣賦部議或從或否而公初未嘗憚煩也二
十五年春有

詔擢禮部尚書掌詹事府事吳人空一城痛哭叩
轅門留公不得則塞城闔阻公行又不得則遮
道焚香以送者亡慮億萬人踰千里不絕及公
渡淮乃已忌者覘知之愈益憾公

上遇公厚每會推會議必問湯某云何公亦感
上殊遇凡是非可否必侃侃正言不嬰不撓忌者

方力謀中傷顧未有以發而會五官臺郎董漢臣上書言十事語侵內閣或言漢臣本不知書有代草者御史受風指深文劾漢臣內閣擬旨下部究主使

上乃命集九卿更議衆咸欲抵漢臣罪忌者逆沮公幸勿倡異議公曰彼應

詔言事耳大臣不言將愧謝之不暇而忍周內耶因舉手自指心曰如此中何忌者大慚且憤所以誣鱓公萬端且摘公去吳時教令中語指為市恩干譽於是公已患病竟為讒言所中有輔

導

皇太子之命公以病辭忌者欲藉是加罪

上不聽僅令回奏遂嗾廷臣交章劾公又不聽後先報聞而已先是公病思歸自以新被讒不敢請告乃薦前道臣耿公介侍

皇太子講冀以自代耿公老儒迂謹與舉朝不相得復嗾廷臣劾公所薦非是部議革職

上特寬其罰鐫五級留任猶不愜忌者意羣謀中傷益急公適聞太恭人病乃上疏乞暫歸省

上遣使齎手詔慰諭且欲賜第京師命公迎養公

叩頭言老母萬不能來奏上有

旨不允公去當公之乞歸也忌者宣言

上怒將隸公旗下得

旨猶秘之急召詣閣中公以病扶掖上輿道路譁傳湯尚書入旗矣皆泣下而蘇松諸郡客都下者數百人竝集鼓廳門將擊登聞鼓訟冤聞公還始散是時微

上保全公禍幾不測矣已而

皇太子見公羸瘠大驚曰公果病至此耶越數日

命改工部尚書忌者勢不得騁更謀興大獄羅織公罪不數日而公病遂革方禍急時或勸公委曲請諸公居間俾稍解者公哂曰吾義命自安六十老翁尚何求哉或又勸公發忌者陰事以紓其禍公又曰吾有老母在未敢以此試也故士大夫咸以為難配馬恭人子男子四曰溥曰濬曰沆皆州學生曰準子女子三適國子監生趙登諸生李中張淑文孫男五孫女七公平居潛心聖賢之學其於性命之淵微造化之精奧無所不探而一以誠正為本於古今之治忽事

會之得失無所不綜而一以忠孝為先所撰著
洛學編一卷補睢州志五卷詩文若干卷琬前
在史館出入必借藉公淬礪講貫者甚至不知
公於程朱何如以視真魏許姚諸儒則當出其
上矣琬方請急亦嘗諷公以歸未幾而公欲薦
琬為明史副總裁自江南被

召又欲以宮寮薦琬固謝不可且曰願與公同其
退不願與公同其進也琬長於公三歲訖今猶
覩顏人間而公不可作矣每一憶公輒淚泫泫
被面何忍執筆銘諸然琬雅以直諒為公所許

倘不能白公之志而暴其受讒始末以示天下
後世不幾負我死友哉銘曰

猗湯屢遷肇興睢陽逮公之身彌久益昌為國
純臣為世儒碩道禰洛閩志宗稷益維我

世祖拔公妙年起家內院付以大籓翩然引身潛蟄
閩里

世祖儲之遺我

聖子入登侍從出拊江淮

帝念疲氓往哉汝諧再期政成遽蒙前席邁彼含
沙伏機以射何交之泰而命之遭屢習於坎出

險斯艱風雨露雷罔非

帝德

帝心簡在寧虞巨測生榮歿哀公奚憾焉天可必
乎人定勝天黃岡之丘不騫不圯瘞是銘詩以
埃良史

祭湯夫子祠文

門人王廷燦

粵維嵩嶽代生哲人周多吉士生甫及申耆英
宿德宰相元臣汝南論道秘閣傳經淵源溯接
惟公絕倫初邁奇剝寇虬廬焚貞母罹難誓捐
厥身含悲厲志嚴命是遵流離東浙備歷艱辛

依棲山窟猛虎為鄰夜攻墳史彼嘯我呻採薇
作飯掃葉為薪或憐餽食固却且嗔義不苟取
自昔諄諄幸逢

聖代得返里闈文明肇啟應運攀鱗南宮已奏不
肯垂紳吾斯未信強學席珍多文為富志非飽
溫學優則仕乃達

紫宸校書虎觀藜火夜昕古今典故縷晰羣分旋
膺旻旒藩守西秦供輸約法安集懷仁瘡痍頓
起驕悍咸馴繼遷南顧撫叛綏循靜弭風鶴智
掃烟塵江南半壁賴以寧氛劬勞報國輒念老

親陳情屢表感動蒼旻去官就養菽水非貧五
車博覽三徑叢堙匪耽巖壑實慕昏晨東山久
卧屬望彌殷徵書驟下敦促續紛重登天祿
經筵備陳學惟誠正治先耕耘

帝念東南賦重民屯移風易俗非公莫掄澄清攬
轡至便埋輪豺狼是問芻蕘是詢暑不張蓋寒
不帷茵食惟荼薺飲則冰尊正已率屬墨吏羣
奔屏輿下士道義知尊吳民好訟劍口鋒脣公
惟教化告語閭閻吳俗好巫載鬼號神公惟正
直投諸水濱利興弊剔刑簡政均積澆仍陋一

旦還淳時惟胄教急藉凝丞去我父母師保青
振干戈羽籥輔導殷勤詩書禮樂恭敬溫文懋
成

睿德寵錫彌頻爰陟司空夙夜惟寅心勞力憊一
旦忽淪吳民悲慟罷市停昉公之德業實比陽
春敷天均被南國尤欣公之節操有似松筠窮
且益堅顯則愈伸公之立行一本忠誠求志行
義移孝事君公之學道遠紹關閩祇期身體不
事諛聞廷燦不才荷公陶甄生我成我欲報靡
因今來承乏實公棠陰勿剪勿伐謳誦猶新俎

豆禮祀永矢不泯始知直道乃在斯民儀型匪
遠愧疚彌急拜公祠下來格來歆

祭 座主湯潛菴夫子文

仁和受業沈 佳

嗚呼道歷千載聖遠言湮不有哲人孰繼其傳
繫惟夫子鍾嵩嶽之靈秀紹伊洛之微言力闡
乎天人之秘識參乎造化之權以一心而為百
代斯文之寄以一身而為斯民社稷之攸關方
年少而登巍科躋膺仕不數載而遂高蹈乎林
泉及再出而應徵召也內侍

講幄外撫吳會皆著其蹇蹇匪躬之節而為

聖主咨訪之惓惓繼拜司空之命方簡畀以大任
夫何竭忠盡瘁竟溘焉館舍之是捐嗚呼夫子
之心昭揭若青天白日夫子之行和靄若霽月
春溫夫子之望尊嚴若北斗泰山而其任道之
勇也不以一己之進退為憂喜每以一夫不獲
其所為恥不以一善成名自足常以望道而未
見為慚其律身之嚴也凜兮若秋霜之烈毫無
私欲之為累湛然如長江之濯而人不得以私
事相干其與人之和也儼然望而起肅即之如

坐乎春風秩然言之有條使人皆足厭飲乎其
間故其論學則大中至正絕無門戶之同異惟
宗乎洙泗濂洛為正傳其述經則審端尋緒沉
潛涵泳絕無意見之偏私惟闡乎六經四子為
淵源其肆力乎文章也旁搜遠紹含英咀華彙
萃百家之言足以迴狂瀾而措柱乎中天至於
教人之方以躬行為要以涵養真心為宗因人
而施務循聖人之成法而不徒襲乎簡編其用
功之密闇脩默識體認天理雖當事機之紛沓
而此心寧一常覺其不愧不怍而恬然於易以

象占為主於春秋以經文為正於詩書禮樂則
有論述皆以經解經正大詳明日新之學發乎
心得而不事穿鑿乎陳言洛學有編郡乘有志
而國史之輯則期於確核至曆法象緯輿地下
及醫卜之書靡不為之究晰而精專是以德業
事功超軼乎百代而大節偉行彪炳乎人寰若
夫孝友篤於家庭誠信孚於僚友仁慈洽乎民
物自童穉以迄強壯自窮居以逮仕宦無一事
不可告人而質諸天雖細微之事步履之間有
見其暉吉之流露而好善之誠惟恐不及疾惡

之剛若將浼焉又發乎至性之醇全擬其遇事
明練有更生稚圭所未及而立心正大則與彥
國君實相參其志操澹泊有類乎諸葛忠武而
造詣純粹殆合乎明道伊川斯真

聖朝之名世而得統於儒先者也佳荷蒙甄拔久
侍經帷令季子準命從佳遊愧難報夫埃涓思
立雪之有日未罄乎仰鑽步趨之力忽聞曳杖
之訃有失聲於山頽木壞之奚瞻嗚呼易名之
典崇祀之儀方有俟乎

天恩之寵錫而仰止靡從依歸無所又不勝其寢
門私慟之流連然而不忘者德不朽者功不可
泯者史冊之垂遠克繼序者孝子之象賢夫子
其亦可以浩然含笑於九原嗚呼尚饗

揮僉事因家焉明威將軍陝西岷州衛守備

諱易者先生高祖也曾祖諱希范祖城隍縣

承祖諱敏州學生父諱祖彝州學生以先志

貴封中憲大夫陝西按察司副使先生諱

字孔伯別號荆峴晚又號潛菴故天下稱

菴先生

附錄
明練有更生種士州未及而士心正大則與
國君實相參其志操履有類乎諸葛忠武侯
造詣純粹殆合乎明道初財斯真
聖朝之名世而得統於儒先者也
侍經帷令季子奉命從台遊地難報大埃
立雪之有日未暮乎仰鑽士進之力忽聞
其亦可以哉然舍英汝大泉點和尚譽
別者史冊之垂表克繼其香芬子之譽買夫子
門徒之志動然而不心者斷不昧昔亦不可

潛菴先生年譜

先生先世為滁之來安人以軍功為神電衛
世襲百戶始調中都後調睢陽衛陞世襲指揮
揮僉事因家焉明威將軍陝西岷州衛守備
諱易者先生高祖也曾祖諱希范趙城縣縣
丞祖諱敏州學生父諱祖契州學生以先生
貴封中憲大夫陝西按察司副使先生諱斌
字孔伯別號荆峴晚又號潛菴故天下稱潛
菴先生

門人王廷燦編輯

紀年

時事

出處

奏疏詩文

金閭劉藻文刻

故明天啟七年

丁卯

崇禎元年

戊辰

崇禎二年

巳巳

崇禎三年

庚午

崇禎四年

辛未

崇禎五年

壬申

崇禎六年

癸酉

崇禎七年

甲戌

十一月二十日先生生

先生八歲者儒王慕祥開塾講小學先生侍坐終日無倦容歸即見諸行事遇貴胄輿馬赫奕者泊然不以動念王先生謂中憲公曰令

子真大器也

崇禎八年

乙亥

崇禎九年

丙子

崇禎十年

丁丑

崇禎十一年

戊寅

崇禎十二年

巳卯

崇禎十三年

庚辰

崇禎十四年

辛巳

崇禎十五年

壬午

流賊李自成寇睢陽

先生十六歲就傳郭外聞寇至奔還城門已閉遠濠痛哭父中憲公

先生十五歲為制舉義不起草宿儒多遜為不及家貧借人書篝火讀達旦率以為常

紀年

時事

出處

奏疏詩文

紀年

時事

出處

奏疏詩文

崇禎十六年

癸未

崇禎十七年即

大清順治元年

甲申

流賊李自成破北京

母趙恭人遣人從城上語使去先生不忍遠違伏郭外斷蓬坑中州民開門納賊中憲公負母逃先生冒險入城趙恭人已罵賊膺刃死矣先生號泣不欲生絕食六日中憲公強之乃食既殯隨中憲公避難河北舌耕以養

先生十七歲中憲公往衢州先生侍行

先生十八歲在衢州聞變乃寓衢讀書山中每念母恭人節烈常中夜大哭哭已復讀夜深虎嘯林外與書聲相間山中民皆感動時時來餽燈油米食先生卻不受日焚敗葉繼晷飲泉水咽糠粃而已尋至南京以流寓應試七試皆冠軍已而有令納軍需數兩方許與試遂棄去

順治二年

乙酉

王師定中原

順治三年

丙戌

先生十九歲奉中憲公由江西還鄱陽歸

先生二十歲補弟子員

順治五年

戊子

先生二十二歲舉于鄉

順治六年

己丑

先生二十三歲會試中式

順治七年

庚寅

順治八年

辛卯

順治九年

壬辰

先生二十六歲成進士授弘文院庶吉士邸舍不蔽風雨閉戶讀書不妄交遊學士山陰胡公兆龍欲屈一見終不肯往

應 詔擬 御製 大清會典序及送 敬謹親王詩

順治十年

癸巳

紀年

時事

出處

奏疏詩文

紀年	順治十一年	甲午	時事	詔選翰林科道出任監司	出處	先生二十八歲授國史院檢討	奏疏詩文	上陳史法疏請表揚明末死難諸臣
	順治十二年	乙未			論	先生二十九歲名在選中有品行清端才猷贍裕之		
	順治十三年	丙申				先生三十歲以得職銜加一級用補潼關道副使		
	順治十四年	丁酉		賈恩天下		先生三十一歲階中憲大夫封父如其官贈母恭人		華嶽祈雨文
	順治十五年	戊戌			朝	先生三十二歲治行為關中最撫軍陳公薦于		
	順治十六年	己亥				先生三十三歲陞嶺北道叅政轄贛南二府甫三月清積案八百餘件贛據四省上游稱嚴疆有明舊將李廷玉以萬人入山為盜值海寇犯江寧贛人騷然先生密陳方畧于上官擒廷玉而賞其餘黨贛		

紀年	順治十七年	庚子	時事		出處	人以靖上官方倚先生如左右手先生念其父中憲公乞假歸養者馬一匹鬻之充資資百姓扶持相送莫不太息泣下有痛哭者	奏疏詩文	
	順治十八年	辛丑						
	上康熙元年	壬寅						
	康熙二年	癸卯				先生三十八歲丁中憲公艱		
	康熙三年	甲辰				先生三十九歲葬中憲公數日一省視墓樹數百株一株損秋獻不置		
	康熙四年	乙巳						

紀年	時事	出處
康熙五年 丙午		先生四十歲服闋聞孫鍾元先生講學蘇門先生賃驢往受業門下每質所疑孫先生亟稱之歸而所得益遂所行亦益力屹然推中原巨儒
康熙六年 丁未		奏疏詩文 上孫先生書 上孫先生書 一樂堂卷
康熙七年 戊申		
康熙八年 己酉		
康熙九年 庚戌		
康熙十年 辛亥		
康熙十一年 壬子	上諭舉外官告病者病痊以原官用	先生四十六歲州守程公以先生應 詔布政金公鉉力主之先生以母老懇辭再三事乃已
		與州守程公書

紀年	時事	出處
康熙十二年 癸丑		
康熙十三年 甲寅		
康熙十四年 乙卯		
康熙十五年 丙辰		家居感懷詩三首
康熙十六年 丁巳		
康熙十七年 戊午	詔舉博學鴻儒	應 召入都留別 里中親友詩二首 途中苦雨詩 長 垣北十里學堂岡 有夫子廟相傳四 賢言志處詩 趙 憲清卷跋
康熙十八年 己未	御試博學鴻儒取湯斌等五十二人	應 先生五十三歲 御試 先生五十三歲
		應 詔璿璣玉衡賦 省 奏疏詩文

紀年

時事

出處

奏疏詩文

康熙十九年
庚申

上親第為甲等補翰林院侍講

耕詩
御試恭紀四十韻
編明太祖本紀四卷
列傳十餘卷
院中宿直八韻
孫徵君詩卷跋

康熙二十年
辛酉

先生五十五歲充
日講起居注官主浙江鄉試轉翰林院侍讀

二月初侍
講筵紀事二首
擬上賜大臣遊溫泉詩四首

康熙二十一年
壬戌

先生五十六歲充明史總裁

送陳別駕詩

康熙二十二年
癸亥

先生五十七歲轉左右庶子日直
講筵纂脩
兩朝聖訓

裁定明史曆法天文志
英景憲孝四朝聖訓

康熙二十三年
甲子

江蘇巡撫余國柱陞都察院左都御史
先生五十八歲陞內閣學士兼禮部侍郎尋陞江蘇巡撫

睢沐二邑秋災情形疏
報泰州災入永蠲案疏
請改並徵積補為分

皇上年巡

賜鞍馬綵緞白金五百兩繼
賜御書三軸先生到任即報蠲睢寧

睢沐二邑秋災情形疏
報泰州災入永蠲案疏
請改並徵積補為分

紀年

時事

出處

奏疏詩文

沐陽邳州賦數千兩又報捐秦州前二年賦入永蠲案內未幾
皇上年巡先生扈

年帶徵疏
請蠲十八十九兩年災欠疏
請除邳州版荒疏
請蠲九釐餉疏
請寬考成疏
請調驛困疏
請免蘆課買銅疏

上再賜御書一軸蟒裘一襲羊酒珍羞回
鑾日傳
盲令逕歸署其

春注多類此江南故習豪侈歲時婦女爭烜耀治服嬉遊山水以為常而市井無賴子喜捕博諸戲又尚拳勇用鬪毆先生悉禁止不少貸為政尚簡靜然下令期於必行賊吏蠹胥悉搖手屏足相戒不敢犯重脩泰伯祠朔望必往謁又謁范文正公祠周忠介公祠以為眾勸數詣學命諸生講孝經俾幼穉悉得列坐以聽拊循細民若惟恐傷之者吳俗自是大變時人見吏胥奉法權貴不敢請託而民用日省

沐陽邳州賦數千兩又報捐秦州前二年賦入永蠲案內未幾
皇上年巡先生扈

年帶徵疏
請蠲十八十九兩年災欠疏
請除邳州版荒疏
請蠲九釐餉疏
請寬考成疏
請調驛困疏
請免蘆課買銅疏

紀年

時事

出處

奏疏詩文

康熙二十四年

乙丑

淮揚徐大水
行取天下知縣考選科道

乃因先生姓為諧語曰黃連半夏人參湯也又以自奉儉約謂豆腐湯云

請免淮揚徐民賦
請毀淫祠疏
薦劉滋郭琇疏

康熙二十五年

丙寅

皇太子出閣
上諭吏部古帝王諭教太子必簡和平謹恪之臣命統領宮僚專資贊導江寧巡撫湯斌任講筵時素行勤慎朕所稔知及

先生六十歲陞禮部尚書管詹事府事先生聞即日行吳人空一城痛哭叩轅門留先生不得則塞城門阻先生行又不得則遮道焚香以送者數十萬人逾千里不絕先生念繼母年

康熙二十六年

丁卯

簡任巡撫以來潔已率屬實心任事允宜拔擢大用風示有位特授禮部尚書掌管詹事府事

高便道歸省親
太子出閣先生侍講
太子綠頭牌啟奏
上特命先生行坐講禮尋充經筵講官

考選天下行取官以吳江知縣郭琇為試監察御史
閣臣宋文恪公薨以余國柱為大學士
五官靈臺郎董漢臣上書言事
以前道臣耿介為詹事府少詹
選廷臣為
皇太子輔導官
少詹事耿介以原道銜致仕

先生六十一歲會董漢臣事起漢臣上書言十事語侵內閣或言漢臣本不知書有代草者御史以深文劾漢臣內閣擬旨下刑部究主使
復傳
旨詰問閣臣逆阻先生曰幸勿違眾
議先生厲聲曰
上因早求言漢臣應
詔言事大臣不能言反罪言者如此
心何閣臣大慚恨居一二日有輔導

皇太子之命先生具疏辭內閣欲

紀年

時事

出處

奏疏詩文

因之加罪
上不聽第責令回奏一時詹事府翰林院都察院累章劾奏然實不能有所指

上輒報聞而已先是先生病思歸薦前道臣耿介侍

太子冀以自代耿公老儒迂謹與舉朝不相得廷臣劾先生所薦非人部議革職

上薄其罰削五級留任適先生聞繼

母病上疏乞暫歸省

上遣使賫手詔留且欲

賜第京師命先生迎養先生叩頭言

母老不能來奏

上有

旨不允先生去先生之乞歸也忌者

宣言

上怒將隸先生籍旗下得

旨猶秘之召公詣閣中先生以病扶掖上輿道路譁傳湯尚書入旗矣

皆泣下而蘇松諸郡客都下者數百人並集鼓廳門將擊登聞鼓訟冤聞先生歸始散是時微上保全禍幾不測矣
皇太子見先生羸瘠大驚曰公果病

上察知先生孤介不容於時

待遣御醫診視尋

命改工部尚書是日九卿會議先生

入講不至科道官又劾先生部議

降二級調用

上復命留任不數日而病革矣十月

初六日奉

命詣潞河勘楠木閱三日抵暮歸言

笑如平時漏下二鼓猶與二子溲

沈講乍見孺子將入井一章問夜

何其乃就寢曰明朝尚會議也天

明先生逝矣家無新衣敝衣以斂

貼金銅帶加朝服其上朝服緞即

上賜也

上聞遣學士多奇翁叔元以茶酒賜奠
命馳驛回籍照尚書品級頒賜祭葬出自
睿斷非閣臣擬旨也京師弔者莫不盡哀扶輿出都
道旁騎者多下馬拱立歎息入里
白衣冠泣涕迎者近萬人先是吳
人為先生建生祠於學宮至是會
哭祠下者數千百人有司以時致
祭惟謹常州奉祀道南書院而紳
士復肖像於懷嵩堂中歲時瞻拜
數郡畢至里中奉祀鄉賢特祠奉
烝嘗焉越十八年癸未門人王廷
燦令吳邑從士民之請建坊胥門
之泚以誌追思云

康熙二十七年

戊辰

陞試監察御史郭琇為

左僉都御史

余國柱免

年譜終

古來賢人君子有功德於民其生而存也則景行而則倣之即不幸而歿也咸嗟歎而詠歌之自三代而下垂諸史策者比比而有茲惟吾 潛菴湯夫子道高德厚過化存神固所稱有功德於民者也自山頽木壞而後天下之人靡不含哀茹歎如喪考妣吳中為 夫子駐節之地風雅之士歌詠盛德而悼痛淪亡者篇什尤多 廷燦既編輯遺書付之剞劂凡於吾 夫子有所關涉不拘頌言輓章罔不擷採搜羅附於文集之後所以明吾 夫子深仁厚澤入人之深且以見吳中人士愛戴之

誠不為溢美之辭而悉言夫踐履之實俾後之閱者咸知觀感而興起其於世道人心補益殊非淺鮮昔史稱荀叔慈歿學士製誄者二十有六人以今視昔不更有光哉第隨到隨刻編次無敘惟望先輩達尊諒而恕之幸甚

錢塘門人王廷燦拜識

湯尚書遺愛坊成恭記二律以識盛事

長洲彭定求

陡見崢嶸柱石磐尚書清德表千官棠陰地在歌
方續峴首人來淚已殘聲震山魑朝爽淨光搖江
練夜濤寒

坊在胥江之澣正與公所撤毀上方淫祠相望

道旁遺愛碑多少過

此應教剔眼看

誰能生死極榮哀直在斯民亦諒哉清獻政聲留
蜀道文成講席布虔臺當年尚冀遵鴻復此日空
瞻化鶴來一簣構基經歲月只緣霖雨舊培栽

睢陽道中再哭 湯夫子

門人王廷燦

程門立雪六年餘，賜斷生前一紙書。今日睢陽城畔路，不教三步已迴車。至今四海仰人宗，莫歎當年道莫容。嵩嶽長留千古色，青天三十六芙蓉。

讀湯太夫子遺集

錢唐王延年

霜高月白雁聲初，小閣挑燈讀舊書。一代儀型今已矣，千秋俎豆果何如。程朱正學今方續，聞見真傳洵不虛。更有吳民思往事，峴山片石共欷歔。

輓詩

至睢州謁湯潛菴先生祠堂

徐鉉電發

大道已榛蕪，講學恒拘迂。偉哉湯先生，雪苑之醇儒。蚤射金閨策，讀盡中秘書。許身於稷契，致主期唐虞。敷歷外臺久，歸卧松陽廬。蘇門孫夫子，六經勤菑畲。先生往從之，沿伊而溯朱。學貫天人際，品超姚許餘。繪川築書院，弦誦惜居諸。遺榮謝簪紱，優詔復敷趨。載拜履彤墀，給札領石渠。才識冠三長，班馬為前驅。不久直經筵，啟沃紹都俞。撫

輶言
綏迄三吳中孚感豚魚喁喁遍窮壤化與三代俱
惟能本經術澤遂被海隅俄焉晉宮詹輔導翊
皇儲稽古桓榮並後學甘盤如自蒙宣室召駭機
踵前途履險而習坎寧肯效囁嚅抗論益蹇蹇進
退猶于于 天王固聖明始終鑒臣愚哲人已云
萎正氣猶傷敷嗟彼訓狐鳥兩眼張睢盱聚鬼興
徵妖震熠驚天衢陽烏倏相照僥倖仍須臾曷若
公精靈千載恒不渝予本漁樵侶曾接公襟裾抽
簡蘭臺側執轡時相於自愧真不才廿載賦歸與
俛仰瞻俎豆髣髴奉盤盂西州涕洟深策馬為躊

躅

輓 湯夫子八首

門人王廷燦

似齋

不意光芒失宿雯西風一慟淚沄沄陳情有表思
慈母封禪無書答 聖君人望久期占夢卜天心
何故喪斯文六年函丈承恩切築室松楸念祇殷
瀛州領袖藥珠仙出守淮陽治行傳二陝功成推
鸞鷲千秋志在薄貂蟬直將濂洛真儒續不獨關
西夫子賢白鹿至今留講席西門投策淚如泉
生平小技薄雕蟲翻以長楊賦薦雄雅擅三長傳
史筆起衰八代仰宗風丹書初命銅龍署講幄仍

兼白虎通簪筆石渠如佩印馬遷倘在更誰工
儒臣暫借撫瘡疾駐節吳中恰一期學道愛人殊
不易改弦鼓瑟復何疑虎丘歌舞停春舫茂苑淫
昏斥夜祠况是新租蠲去後至今淚墮峴山碑
一生孤介絕人援何意歌謠徹帝闈少海光搖
開講幄九重眷重動文轅名尊鄧禹因時詔坐
寵程頤以道掄身到玉樓還進秩寸棺坏土總
君恩
事業范韓真足數勲名周召可相於宮中求諫時
方切殿上危言衆不如共慶朝宗歌底績豈今吾

道笑迂踈都俞正際明良盛寧必遺言效史魚
一年九轉被殊恩更以清名動至尊梁有懸魚
慚吏餽坐常息燭撤官燔公私所寄惟經術清白
還留到子孫死後不須來大鳥親揮琬琰慰忠魂
感舊彭宣不自持青衫落拓淚如絲未成國士羞
言報不遇名賢恥受知地厚天高懷至德讀書稽
古慰前期可憐隔歲閭門路拜手終成生死悲

湯先生輓詞

年家子范

濬陶山

睢州先生世大儒正己化物治化敷至今吳民懷
舊德明禋俎豆情敬愉先生之學宗閩洛息邪斥

輶言
偽劘檠株少登侍從著聲譽褒忠志紹良史狐既
典大藩歷秦豫詰奸禁暴民俟蘇設施未竟拂衣
去言甘養志歸休乎素食里閭二十載蘇門講學
探驪珠師錫宏材膺

帝簡紬書再上承明廬

講筵敷陳盡忠悃羅珍宛委澄冰壺超遷賚予隆
眷注往哉俾乂來三吳習俗豪侈困凋瘵燠休痛
疾還其初為政簡靜若飲醇至誠下感豚魚孚吳
民苦承勝國賦不憚請命蠲逋租晉秩卿尹方嚮
用讒言指摘交相誣羣飛刺天荷明聖忽告起起

命矣夫吁嗟吳民失怙恃聞赴老幼爭號呼祠堂
綽楔久彌光先生正氣充寰區嗟彼讒人旋被譴
瞬息嗷日當天衢憶昔荒祠佩明訓名賢振古道
自符先生既喪失模楷遺文把讀哀只且撫拾生
平陳敞帚高山仰止微誠攄

康熙癸未 似翁老父臺為

睢州湯大中丞建坊胥門作歌紀美

長洲顧嗣立 俠君

睢州中丞一代儒福星照耀來三吳謳歌如新二
十載功德勒石臨通衢念公挺生在德里中原文

物稱名區夏峯負笈得窅奧淵源直欲追程朱玉
堂篇翰乃餘事乾清奏對相交孚 特命儒臣擁
節鉞闔閭城內來分符敦本務實正風俗諄諄訓
誠垂良謨浮誇粉飾所不尚游民奸暴爭逃逋水
花無繆六月靜治平秋雨烟模糊頓令繁華游俠
窟熙熙皞皞歌唐虞又聞吳俗喜事鬼五通作祟
憑妖巫肉山酒海變勝地金錢費擲驚癡愚公曰
此事甚荒誕穢迹豈可留斯須木者付火土投水
邪氛一掃山形癯更憐蘇松財賦重敷陳入奏蠲
浮租

聖心如傷動惻怛 青宮被命朝門趨攀轅頓足
集老幼號啕慟哭聲呱呱白公隄畔多祠宇雕楹
画棟胡為乎列諸學宮輝俎豆文學政事開生徒
檄題日久漸漫漶恩澤猶自淪肌膚近逢賢宰此
踵武門牆勵志思規撫伐山採石樹坊表經營不
日爭投輸清風粼粼動碧浪胥江一掬天然圖我
公精誠在天地感格初不遺一夫我公功德被四
海惠愛幸得專我蘇我公文章傳萬世同時亦許
窮精粗凌轢坤乾擁山岳磨刮日月縣衡壺小子
生晚沐雅化敢以蠡見量江湖聊採公論咏芳躅

告萬萬古言非誣

恭輓 湯潛菴先生四十韻

桐溪後學周旦齡

漢紹

哲人久淪亡大道長晦蝕先生起洛下仔肩實有力巖巖孫徵君理學程朱匹夏峯傳絕業彭戴皆入室先生與之游辨析義無窒如滌去疇疇百川彙為一慎獨裕其本力行蹈其實關閩濂洛宗揭若中天日發而為文辭喬皇富緹帙貫穿經史腴綜核百家籍春王正月辨千古垂不易伊昔筮仕初承明常入直綴輯前代史風霜董狐筆

上御乾清門宣召進著述拜手凜靖共對揚惟怵惕詩文十餘章爰達 黼座側從容沾寵渥都俞動顏色

帝曰斌也才無忝良史職球貝儼高懸鯤鵬競摩擊 特簡涖武林掄文嚴甲乙珉玉期必剖殿最無少失轉盼撫我蘇難勤勵軫恤首陳逋賦疏嬰鱗等藥石痛念民瘡痍何以登衽席吳俗素澆漓綺靡流蕩泆先生能澡刷不賤蔬菽食以身率下僚私謁胥盡黜苗嫠而髮櫛科條慎三尺士敦仁讓風家務淳朴質囊封毀淫祠鬼神亦戰慄梁公

欣再覲文襄驚復出唐虞三代理由茲可漸格肅
謁先祖像正氣凝松柏清節與直道大字銀鈎畫
先忠介祠先生有清節直道四字題額泣吳方二載峻除遽敦迫鰥婢
為泣下父老滋歎息鞠躬輔儲君夙夜殫匡弼
旻天胡不弔溘焉就窀穸嗚呼房杜姿遠溯孔孟
脈賢豪不復作悄愴何時釋

恭謁湯潛菴先生祠并讀遺藁二首

吳門後學周用錫 晉蕃

一代儀刑在千秋俎豆光危微宗聖學廉潔肅官
方毀廟神靈震崇儒雅化彰泣吳纔二載回首倍

堪傷

道為東宮重恩留南土均一生空有作天下更
無人經史存遺論詩篇絕後塵茂陵應詔取憑

仗戴彭身

先生高弟王似齋先生編集遺稿付梓

謁睢州先生祠二首

吳郡後學范儀虞 皆我

漠漠天心不可推斯文既喪世同哀反淳已是乖
前志抱道何堪向夜臺造父御車遺輔軌易牙烹
鼎廢鹽梅懸知英爽宜如在雪涕靈祠奠一杯
我公奚待爵為榮道學真傳朱與程籌國不知成

白髮出山原是為蒼生咸思笑見義皇世誰料悲
聽薤露聲白日作心人盡識那須插竹驗精誠

讀 睢州先生遺書有作

聞輯遺書意已欣開編便覺氣氤氳匡時盡是從
心學載道真為有用文白玉皎然初剖璞碧天湛
若乍披雲聖賢心印傳毫素後代津梁翊典墳

恭輓 大司空睢州夫子二十韻

蔣桂馨

古道誰能復斯文今則無謳歌聯八郡慟哭震三
吳平政真如水回奸不用鉄澤流遐邇徧誠至鬼

神孚風俗還淳樸天心眷碩膚北歸懷

帝德南望喜民蘇詹事

新恩降司空衆議符方期瞻相業詎意喪鴻儒疇
昔存坊表諸生學步趨論文晨已入講道日將逋
點也聞長歎參乎辱一呼窮居甘蠖屈侍坐拔泥
途三載留棠蔭扁舟指上都金山揮涕淚銀管

發現瑜

先慈守節蒙於舟中
手書柏舟遺範扁額

緘笥光家乘銘心泣藐

孤貞操蒙獎擢大業竟須臾聽鼓心猶切升堂夢
不殊神傷憐父老腸結况吾徒道德丘山重聲名
日月俱祠堂依學舍

公專祠在
郡學中

每拜輒嗟吁

輓詩
戊寅春過睢州謁司空湯公祠

嘉定後學張大受日容

過宋頻登夫子堂遺經猶訪鄭公鄉曾遊朗月清
風裏蚤歎浮雲白日傍衆母至今歌子產伏龍疇
昔起南陽音容似昨人千里贏得吳民淚滿眶
斯文天遣付秦灰一老驚嗟泰嶽頽桓傳幾聞加
几杖傳巖虛望作鹽梅青蠅樊棘終俱滅丹鳳梧
桐斷不來卹待祀官田主祭可憐後死困蒿萊

庚辰夏再謁司空公祠

氣與星辰迥功仍竹帛宏重升家廟拜再展部民

情衆水須宗海浮雲不蔽明何時降綸綍典禮備
哀榮

清白遺孫子風流溯古初頻蒙置尊酒都喜說經
書日與公子彥深雅平譚經濟濟昔賢第悠悠
歸客車相邀到南國碑拭淚流餘

過睢州恭謁大司空湯夫子祠

門人周南山臺

先祠數過志褒忠竊愧微才備採風寸進敢忘良
樂顧超遷咸望傳伊功大賢難免羣邪嫉正學從
來舉世攻路出睢州拜遺像回思曩事慨何窮

謁府學 湯公祠 長洲後學徐 遵

虎丘片石才百畝無有一吏無生祠本朝六十一
甲子廢祠瓦礫盈階達 先聖宮牆不易登到今
舍宅范公稱後先輝映韋與胡三祠奕奕何峻嶒
神京卿相集如雲河南湯公寂不聞一朝撫吳承
大受士民見公如見母剔除積弊不終朝孔席未
暖還朝右魑魅狐狸白晝行騎箕天上淚橫肘士
民思公恒嗟吁新祠鼎立同韋胡吁嗟乎虎丘淫
祠等螢火我公千秋俎豆無時無

巡撫湯公遺愛在吳建坊胥江之上吳邑王侯

實為相度經始於其落成也徐生喜而歌之
昔有高士為梁鴻賃春廡下來吳中伯通識之在
傭保死傍要離名不同子胥抉目胥江上蓋世雄
謀自無兩湯公遺愛樹此坊剛節孤忠永相傍

恭謁 睢州湯大中丞祠

琴川後學嚴肇元 尊始

帝簡金符節制雄臣心如水 聖恩崇淫祠既去
還醇俗古廟斯新煥學宮晨夕弦歌盈里閑歲時
講約走兒童東南難解征輸力拜手甘棠挹惠風

謁府學 湯公祠 長洲後學吳昌求

中丞德望許誰倫事業文章獨老成南國盡傳周
召伯經筵常憶漢匡衡去留有道存高節洛蜀何
人擅盛名祠廟遺編俱不朽千秋感慨淚縱橫

縣侯王父母刊 前撫湯尚書遺稿成喜賦

長洲後學沈三復

大儒去後俗仍頑賢牧臨吳雨露還淑化漸看符
舊蹟全書更喜出名山言詞不越倫常外氣象如
遊洙泗間戶置一編同面誨流傳師說賴曾顏

謁 湯大中丞祠 東吳里耆范 炎 鷺公

真儒民信易直道史編遲暮月能成化千炷可作

師石廉遺愛戴棠蔭動悲思丹拜爭流涕紛紛說
逞岢

睢陽湯大中丞輓詩二首

雲間後學范旦勳 書常

河嶽鍾靈間氣生薪傳濂洛入承明學先主敬專
涵養政絕浮華返樸誠減賦不嫌呼顙切焚祠能
使鬼神驚羊公遺愛三吳在墮淚遙同峴首情
玉局頻勞鉛槧空 講筵啟沃侍 璿宮聲華刊
盡無枝葉心性叅來辨異同入奏讜言知愛國出
持使節徧春風龍文百斛扶名教讀罷方知我道

東

謁 湯大中丞祠

長洲倪

煒 彤文

滄浪亭子畔宣聖學宮傍
 巍巍高祠在遺容瞻此
 堂念昔下車初吳會奢華場
 士女逐飲食子弟飾
 衣裳世俗多澆薄嗟嗟倫
 紀亡公時倡鄉約始得
 扶三綱更見楞伽下
 画船晝夜茫一疏奏
 朝廷精忠達 帝芴
 天子曰都俞神鬼勿猖狂
 非公回天力安能靖一方
 釐奸與剔弊匪類皆伏藏
 兩年感道德莠亦化為良
 一日九重召 鳳闕自
 飛翔經濟展懷抱蒼生遙
 相望孰知天難謀人事

更靡常脩文倏忽去棟折榱崩傷
 微風流千古名
 同日月長俎豆永不朽奕奕垂無疆

恭輓

湯大司空

長洲後學汪鶴鳴

臯聞

兩年節鉞鎮三吳竹帛留芳近代無
 崇政不辭勤秉鐸闢邪何惜學投巫
 去官琴鶴同清獻名世文章駕大蘇
 最是民情關切處嘉謨入告屢蠲租

謁

湯大中丞祠

吳門許

璣 漢儀

國家養賢重君子抵柱狂瀾維網紀
 篤生中丞不世才黼黻太平存大體
 直聲勁節古所嘉文武作憲光邦家
 下鍾河嶽之秀氣上含日月之光華
 建

旄開府東南域廉頑立懦懲惡慝祥刑敬獄毀淫
祠頓化薄俗敦實德嘉謨嘉猷動 帝廷 詔書
一夕下青冥入侍禁近握樞密至今父老思棠陰
吁嗟天道不可測泰山頽兮哲人沒脩文已赴召
玉樓丹誠猶自懸金闕巍巍祠宇傍宮牆臯夔勲
業輝穹蒼豈無椽筆留信史能令姓字千秋香

謁 湯大中丞祠

蘇州倪山堂 紀鄰

我公去吳後越廿載於茲恨余生也晚弗及一見
之為到學宮側再拜瞻高祠父老為余言公真王
者師泣吳不二載頓教風俗移申明鄉約禁諄諄

罔倦弛說孝與說弟天性遂勿漓更能隆學校弦
歌三代遺吳儂大堤上出遊多女兒焚香諸佛殿
清明寒食時画船芳草渡笙歌春日遲總之僧尼
輩倚佛為其資古寺暨名山識者空歎嗤公欲革
弊俗一封 聖明知鬼神咸服教咄咄尤稱奇卓
然曠達見謂非公而誰斯豈矯人情於以復民彝
政成閭閻化曷曾煩杖笞可知民唯草上唯風之
吹迄今已云久還足動人思賢哉吳邑侯建坊勝
立碑如見其政蹟彰彰日月垂余聽父老言深信
不我欺願效甘棠頌聊歌下里詞

恭謁 睢陽湯潛菴先生祠五古一章

錢塘後學柴世堂陞升

輓近尚浮文仕宦崇虛譽山巔水涯間所在盛祠
宇羊公墮淚碑最難勝數我嘗三歎息此義殊
非古所以過其間項強不一俯繫惟湯先生聖學
統鄒魯發潛與闡幽萬變而千舉憶余當弱齡謁
公典籍府道貌更巍峩言論更和煦手錄先子書
謂欲昭來許公嘗手錄先君家誠一書謂其門人沈昭嗣曰此匪柴氏一家言凡在後學皆當奉為金鑑余至今誌之體全用乃宏道隆功益溥開府三吳間莫
不藉霖雨去今二十年歌誦猶栩栩愈久不能忘

崇祠祀林塢丹楹間虹梁綺牕映朱戶東風扇桃
花報享薦春醕豈少生則榮沒則棄如土荒祠不
再傳蔓草平烟蕪何似睢陽公公尸永燕處茲余
謁堂皇恭躡步階序遠峯列層城明河橫遠浦山
高而水長矯首緬遺緒哲人難可追日暮尚延佇
讀 睢州先生遺文誌慨 韓金範

不宗洙泗總旁門公獨尋源絕等倫緯地經天儒
者學涵今茹古聖人言昧鄉得日昏蒙破冰谷逢
春氣象溫若使秉鈞酬所願普天澆俗盡還淳

恭謁 湯大中丞祠下里詞四章

輟言
菰蘆後學范

振筠廬

稽首階前意最親瞻公遺像假中真真真假假知
何處不在存生在立身

公亡已閱數千支其奈民心久愈思今日一時公
再活人人拍手又漣沔

革薄還醇漸返初狂瀾隻手障江湖至今俎豆雖
如在安得公生再撫吳

公去當年未建祠人人心上有公祠而今反懼公
生慍滿路皆祠我亦祠

恭頌

湯大中丞

松陵後學黃

晟

祖望

先生底蘊甚深醇治術端由學業真惟事躬行為

表率遂移躡俗沛然新儒風不愧江都茂遺愛何

慚召伯巡可惜吳民福分薄一年未久失仁人

撫吳一載民風新平易近人人自親思昔去時盡

下淚目今迴念暗傷神禮賢下士由情愫講法明

倫善教申倘若文襄歷任久返樸還醇古道振

撫憲湯公枉拜先忠介公祠述德陳情賦謝

共成五百字

沐恩門人周廷煌

明星

一統承恩遍三吳惠澤偏世風誠皞皞王道正平
平遴選無中貴推陞有十銓公承

聖眷矣郡涖我吳焉未至蜚聲遠來臨德政傳明
倫親學校察吏正常員淫祀心都恨先賢意獨專
功欽泰伯德學重子游賢節義相題拂忠貞願寫
宣市塵吠犬少薄俗飲羊蠲金玉無瑕疵脂膏豈
橐饘詐真清狀別虛實譽冰堅熟橘還應直生魚
受却縣不然官燭儉虛袖狄金權身秉成廉性昏
乾飲盜泉折轅塵迫路飲馬水投錢肺石懲奸宄
蒲鞭示過愆四知猶可畏三惑已多湔竹帛垂名
史銘勲鑄器鐫錫龜榮九命啣雀兆三鱣德化行
南國弦歌達北燕報功優德 詔益俸養廉田近

悅咸啣結遐歸願受塵有心偏倒劇無路可夤緣
豈意先公廟鍾情肯惠然登車殷輶輓上馬若鳴
翩儀從瞻雲集旌旗拂日鮮驚聞州郡縣駭目屬
官聯躬俯施深禮心莊豈貌虔依依瞻壁立戀戀
撫几筵義氣悲鸚鵡忠魂慰杜鵑題顏看黯淡棖
桷歎崩騫世態爭羶蟻人情坐破韉貧窮堪拙守
富貴盡勞牽故友零零落寒門漠漠烟拊膺腸肚
裂俯首涕洟漣白面書生懦青羶夜盜全淒涼舊
雨歎形影竹窻眠句讀生徒學丹鉛蛾子研啣鬚
徒抱痛舌血向誰憐有志攀龍遇無才附鳳緣雞

輶言
碑羞蔡智鼠獄愧湯年馬齒將成壯麟經尚勉旃
愁無指劍日恨有戴盆天獻賦蓬萊遠穿楊膂力
緜窮年身矻矻矮屋草芊芊慷慨看梁棟沉吟數
瓦椽白駒光景促清夜夢魂顛喜遇公垂盼欣從
願執鞭大恩還引領小子拔重淵

又謁湯大中丞祠

昔憶兒童竹馬迎今瞻廟貌寸心傾纔臨十郡聲
無價未滿三年治有成學道愛人君子澤畏威易
俗小民情千秋泮辟同為奠感激情深涕泗橫
又湯大中丞遺藁聞已鐫板賦此志感

廿年回首歎秋風擬向遺編得覩公畿甸勤民憂
赤子艱難報主輔青宮鳳皇未必飢思實騏驥還
從馭者雄今日書成應獻納舜衣垂處效奇功

追輓大司空湯潛菴先生

後學楊繼光 宣仲

河南道脈自來深曾為蒼生望作霖天上九關餘
血碧吳中千祀惜棠陰春風遍灑西州泪秋實應
傷北渚心不是平生崇道力狂瀾寧得整危襟

大司空睢陽湯公輓詩

臯里後學楊繩武 文叔

長孺厄湯弘恭顯死望之剛憤坐折辱戇直蒙讒
譏忠佞不並立讀史當鑒茲嗚呼睢陽公名與蕭
汲齊正色位師保羽翼生光輝誓將平生學仰酬
綺皓知儉側更相構抱道生危疑果然殺賢傳千
載同啣悲憶公昔秉鉞惠此東南陞東南民力孱
賴公得撫綏風俗返淳朴教化起衰微公至得所
庇公去何所依父老擁馬首願公行遲遲生留益
州像死畱朱邑祠至今道公字如聞墮淚碑新來
有仙令舊日叨傳衣為公誌遺愛樹表胥江湄胥
江湖汐湧彷彿公來歸嗚呼公之神靈無不之上

為列宿身騎箕下應川嶽作雲雨覆被吳民億萬
斯

讀 湯大中丞遺文即事

吳門後學顧 錦 仲文

攀轅心未遂景仰意仍懸位育功能至鳶魚理自
全真儒雖沒世大道在遺編展卷如親炙書紳為
慕賢

湯大中丞牌坊落成感賦

賈生富經濟董子究天人我公兼二妙到處庇斯
民教養脩王政栽培盡席珍巍坊同峴首對此一

沾巾

恭謁 湯大中丞祠兼頌建坊二十四韻

長洲後學周廷燿

明揚

正氣凌霄漢芳型著簡編哲人其萎矣吾道尚昭
然不任封疆重安知儒術全詔從金馬下節擁大
江偏開府門羅戟中台位列躔驅邪神鬼泣約法
吏人駢 扈蹕麾旄鉞回宮奏讜言旂常功德銘
甲乙鑄書宣俗尚還淳朴情深解倒懸此心圖報
國遑日賦歸田甄別三千士蒐羅什伯賢乘船訪
有道御李歎神仙只欠三年久還期數世延

聖明深器重廷議會鷺遷詎料遭時詬難邀當路
權匪躬心曲折盡職事迤邐直道行三代愚民戴
二天僉謀成綽楔不日上鏤鐫夫子牆高峻門人
禮益專丹楹依泮水遺像想流川景行於今烈清
風振古傳冠裳同肅穆文物自踳躔沐浴網常化
謳歌雅頌篇春秋瞻俎豆不愧是瑚璉

丁卯十月十一日睢州湯夫子卒聞訃痛悼

爰誌輓辭四十言以述知遇之感

長洲博士弟子員高儕鶴

嗟嗟哲人萎吾道何以傳蒼昊不可問泰山其忽

顛生俱失怙恃夢亦墮迤邐回憶撫循日如遊皇
古年愚頑情共勸飛躍化無邊物力皆呈象鈞陶
幸有緣相忘節鉞地惟見福星躔私擬蓬蒿質時
隨子弟肩操觚勤跪問秉禮若臨淵月旦蒙優獎
瞻依近法筵離階目送後頻喚子來前俗慮終身
累春風學士天每聞三省愧嘗歎一瓢賢嗣此攀
車罷猶思叩闕還大江畱片語長揖盼回船永計
民瘼切那堪墓草芊老人投杖泣窮海望空憐至
德真難匹斯文誰補偏達焉名世貴沒矣口碑鮮
俎豆千秋在濡毫倍潸然

再輓 睢州夫子

陶成真夢感大化盡忘形日後思靈雨生前見福
星有碑恆墮淚無草不留青江左祠堂在千秋奉
典型

賢宰登祠日同人推似師一官方下拜萬姓共追
思碑字江心照仁聲童子知相沿二十載誰不動
悲辭

與書 湯公全集有感

古吳後學范君植 稼菴

未盡孤忠答 至尊山頽木壞不堪論峴山洒淚

因懷德澤國含悽為感恩自有遺模能作範何須
歌些夏招魂文章豈待他年重蚤布人寰當格言

讀湯子遺書恭頌五絕句

錢塘俞星留潔存

城頭寄語隔重圍慈母音容頃刻違客路窮經深
夜泣成名纔識故山薇

簡從翰苑鎮潼關文字威名可拔山嶺嶠妖氛岩
域遠神機遺薛盡投閒

假歸讀禮更示師廿載潛脩應詔遲不愧承明傳
信史還將學道拯此離

澄源格靡廢淫祠頓使江南風俗移帝為青宮
資贊翼敢言耆碩補天維

千古真儒世罕諧
偏多愁悵令人懷
遺書一卷風流在
照耀寰區永泰階

王似齋為睢州湯大司空建坊賦詩紀美

仁和顧永年九恒

休言梁木已先萎
衣鉢千秋風範垂
豈獨經傳明繫贄
還于治譜識規隨
甘棠久矣揮遺淚
碣石巍然表去思
立雪程門能有幾
此中全不計官資

睢陽道中再哭湯夫子

門人王廷燦

程門立雪六年餘
腸斷生前一紙書
今日睢陽城

畔路不教三步已迴車

至今四海仰人宗
莫歎當年道莫容
嵩嶽長留千古色
青天三十六芙蓉

讀湯太夫子遺集

錢唐王延年介眉

霜高月白鴈聲初
小閣挑燈讀舊書
一代儀型嗟已矣
千秋俎豆果何如
程朱正學今方續
聞見真傳洵不虛
更有吳民思往事
峴山片石共欷歔

與書湯公全集有感

范君植稼菴

未盡孤忠荅至尊
山頽木壞不堪論
峴山洒淚因懷德
澤國含悽為感恩
自有遺模能作範
何須

歌些更招魂文章豈待他年重早布人寰當格言

轉言

